



# ACTA DO PLENO DA CORPORACIÓN

## SESIÓN ORDINARIA DO 12 DE XULLO DE 2018.

### ASISTENTES:

#### Alcalde- Presidente:

José Luis Oujo Pouso (PP)

#### Concelleiros:

María José Maneiro Quintáns (PP)

José Manuel Deán Pouso (PP)

Juan Jesús Pérez Santos (PP)

Mª Magdalena Pérez Millares (PP)

Antonio Romero Ribeiro (PP)

Joaquín García García (PP)

Josefa Mª Hermo García (PSdG- PSOE)

Luis García Gaciño (PSdG- PSOE)

Mª Asunción Torres Parada (Portodos)

José Ángel Lorenzo Vila (Portodos)

Mª Ánxela Franco Pouso (BNG)

David Barrio Alonso (BNG)

#### Secretario:

José Manuel González García.

Na localidade de Porto do Son (A Coruña), sendo as **20:05 horas** do día **12 de xullo de 2018**, no Salón de Actos da Antiga Casa Consistorial, reúnese o Pleno da Corporación Municipal en **sesión ordinaria**, previamente convocada, baixo a presidencia do Sr. Alcalde- Presidente, D. José Luis Oujo Pouso, coa asistencia dos Sres. concelleiros que se relacionan á marxe.

A Corporación está asistida polo secretario da Corporación, D. José Manuel González García, que dá fe do acto.

Tamén asiste a interventora do concello, Dª. Mª Mar Lirola Delgado.

Unha vez verificada polo secretario a válida constitución do Pleno, dado que se cumpre a asistencia mínima dun terzo do número legal de membros da Corporación, o Alcalde- Presidente abre a sesión.

De seguido o Alcalde- Presidente procede á deliberación e votación dos asuntos incluídos na **ORDE DO DÍA:**

### A) PARTE RESOLUTIVA.

- 1.- Aprobación de actas de sesións anteriores.
- 2.- Aprobación inicial da Relación de Postos de Traballo do Concello de Porto do Son.
- 3.- Solicitud de participación no POS+ 2018 Adicional 1/2018.

- 4.- Incorporación ao Inventario de Bens dos centros de saúde de Porto do Son e Xuño.
- 5.- Aprobación dun convenio de colaboración coa EPE Portos de Galicia para executar a actuación "Acondicionamento do bordo interior de Porto do Son".
- 6.- Aprobación dun convenio de colaboración coa EPE Augas de Galicia para executar a actuación "Saneamento e depuración en Queiruga. Porto do Son".
- 7.- Aprobación do Plan Estratéxico de Subvencións do Concello de Porto do Son para o período 2018- 2020.
- 8.- Aprobación inicial da modificación da base 39ª das Bases de Execución dos Orzamentos Xerais para 2018.
- 9.- Aprobación inicial da modificación da base 46ª das Bases de Execución dos Orzamentos Xerais para 2018.
- 10.- Aprobación de modificacións orzamentarias: transferencia de crédito 7/2018.
- 11.- Aprobación do recoñecemento extraxudicial de crédito 21/2018.
- 12.- Aprobación do recoñecemento extraxudicial de crédito 23/2018.
- 13.- Proposición do grupo municipal do BNG para declarar persoas "non gratas" aos compoñentes da "Manada".
- 14.- Proposición do grupo municipal do BNG relativa á modificación da Lei de Portos de Galicia.
- 15.- Mocións urxentes.

B) PARTE DE CONTROL.

- 16.- Dación de conta de decretos da Alcaldía e actas da Xunta de Goberno Local.
- 17.- Rogos e preguntas.

\*\*\*\*

## **1. APROBACIÓN DE ACTAS DE SESIÓN ANTERIORES.**

O Sr. Alcalde- Presidente pregunta se os concelleiros queren facer algunha observación á acta da sesión ordinaria do 10/05/2018.

Non habendo ntervencións, somete a votación a súa aprobación.

O Pleno Corporativo, trala **votación ordinaria e por sete (7) votos a favor (7 PP) e con seis (6) abstencións (2 Portodos+ 2 PSdG- PSOE+ 2 BNG)**, polo tanto co **quórum de maioría absoluta**, sendo trece (13) o número legal de membros da Corporación, **APROBA a acta da sesión ordinaria do 10/05/2018.**



## **2. APROBACIÓN INICIAL DA RELACIÓN DE POSTOS DE TRABALLO DO CONCELLO DE PORTO DO SON.**

O Sr. secretario dá lectura á proposta da Alcaldía, que é do seguinte teor literal:

### **“PROPOSTA DA ALCALDÍA- PRESIDENCIA**

**D. José Luis Oujo Pouso**, Alcalde- Presidente do Concello de Porto do Son, no exercicio das facultades que lle confire o artigo 21 da Lei 7/1985, de 2 de abril, reguladora das bases do réxime local, propón ao Pleno da Corporación a adopción do seguinte ACORDO, non obstante resolverá o que estime conveniente:

Visto que a relación de postos de traballo (RPT) é o instrumento a través do cal se realiza a ordenación do persoal, de acordo coas necesidades dos servizos, e se precisan os requisitos para o desempeño dos diferentes postos. A RPT é o instrumento técnico xurídico ao que corresponde a organización dos recursos humanos, tanto do persoal funcionario como laboral.

Visto que a creación de novos postos de traballo, amortizacións e redistribucións, e en xeral a ordenación dos postos de traballo, representan un claro exercicio da potestade de autoorganización que aos concellos lle recoñece o art. 4 da Lei 7/1985, de 2 de abril, reguladora das bases do réxime local e o art. 69 do RD Legislativo 5/2015, do 30 de outubro, aproba o texto refundido da Lei do Estatuto Básico do Empregado Público (TREBEP).

Visto que a proposta de RPT foi negociada cos representantes das organizacións sindicais e dos empregados públicos municipais na Mesa Xeral de Negociación, nos termos previstos nos artigos 34 e 37.2.c) TREBEP, e aprobada por unanimidade na sesión dese órgano negociador do 22 de xuño de 2018.

Considerando que o art. 74 TREBEP establece que as Administracións Públicas deberán estruturar a súa organización a través das relacións de postos de traballo ou outros instrumentos organizativos similares que comprenderán, ao menos, a denominación dos postos de traballo, os grupos de clasificación profesional, os corpos ou escalas, no seu caso, aos que estean adscritos, os sistemas de provisión e as retribucións complementarias e que o art. 202.1 da Lei 2/2015, do 29 de abril, do emprego público de Galicia (LEPG) lle impón ás Entidades Locais a obriga de elaborar as súas correspondentes relacións de postos de traballo.

Considerando que a proposta de RPT aprobada pola Mesa Xeral de Negociación se axusta ao previsto no art. 74 TREBEP e 90.2 LBRL, en canto se realiza a ordenación do persoal de acordo coas necesidades dos servizos.

Considerando que, conforme ao disposto no artigo 22.2.i) LBRL, o Pleno da Corporación é o órgano competente para a aprobación da RPT e que, aprobada esta inicialmente, deberá someterse a un trámite de información pública por un prazo non inferior a 20 días, elevándose a definitivo o acordo de aprobación se non se formulan reclamacións, alegacións ou suxestións, segundo dispón o art. 202.2 LEPG.

Visto canto antecede, **RESOLVE:**

**Primeiro.-** Aprobar inicialmente a relación de postos de traballo do Concello de Porto do Son que se incorpora como anexo a esta proposta.

**Segundo.-** Dispor a apertura dun trámite de información pública por prazo de 20 días hábiles, a fin de que todos os interesados poidan presentar as reclamacións, suxestións e alegacións que estimen pertinentes.

Para o caso de que non se formulen alegacións ou reclamacións, este acordo elevarase a definitivo e procederase á publicación da RPT no Boletín Oficial da Provincia e remitirase copia aos órganos competentes da Administración Xeral do Estado e da Comunidade Autónoma de Galicia no prazo de 30 días.

Porto do Son, 4 de xullo de 2018.

O Alcalde- Presidente,  
Asdo. José Luis Oujo Pouso.”

D<sup>a</sup>. Josefa M<sup>a</sup> Hermo García comeza agradecendo as 2 reunións mantidas cos grupos políticos da oposición en relación con este asunto.

A continuación, referíndose á Relación de Postos de Traballo (RPT), sinala que, nun documento tan importante observa determinadas desigualdades salariais entre algúns empregados públicos: p.e., entre o monitor e un técnico hai 10.000 euros de diferenza a favor deste último, a pesares de que as súas funcións son idénticas e o último só ten encomendado a maiores a función de “coordinación”. Prosegue indicando que, doutro lado, no “Documento 1” faise referencia a titulacións como “diplomado” e “licenciado”, mentres que no “Documento 2” se menciona o art. 76 da Lei 7/2007 na que xa se fai referencia ao “Marco español de cualificacións para a Educación Superior” recollen as titulacións adecuadas á nova normativa, polo que poden xurdir problemas coa acreditación das titulacións requiridas; trátase dun erro que habería que corrixir.

Para rematar, indica que o posto de “técnico de turismo”, que require do grao en ESO para o seu desempeño, ten asignadas unhas retribucións de 20.000 euros; engade que a Sra. Maneiro Quintáns dixo que a RPT tentaba evitar as desigualdades salariais pero xa vén con elas.

D<sup>a</sup>. M<sup>a</sup> Asunción Torres Parada le a definición legal de RPT e sinala que o seu grupo non participou na súa elaboración, pero agarda que o concello cubra con ese documento as necesidades dos empregados de cada área e respecte as funcións que viñan realizando. Apunta que son coñecedores de que hai traballadores moi desconformes coa RPT, polo que agardan que aleguen e o concello dea unha satisfactoria resposta ás súas alegacións.

Remata afirmando que descoñecen o detalle da RPT polo que non van entrar a esmiuzala.

D<sup>a</sup>. María Ánxela Franco Pouso menciona que se deu información sobre a RPT e se convocou unha xuntanza coa empresa que a elabora, pero non se atenderon as propostas que fixo o BNG nin nesa xuntanza nin nas sesións plenarias. Tamén afirma que o BNG considera que os recursos humanos son o activo máis importante dunha empresa e que esta sexa do seu agrado é fundamental.

Continúa expoñendo que o seu grupo vai absterse na votación polos seguintes motivos:



- Queren que se lles busque solución aos “falsos autónomos” que traballan nas Casas da Cultura ou na limpeza e non admiten que se diga que é un problema que vén de lonxe; a RPT non recolle esa situación. Engade que lles constan denuncias dese persoal contra o concello, algunha gañada, e pregúntase ata cando eses traballadores van ter que acudir ao xulgado.
- A RPT foi votada por persoas que tiñan contratos temporais de 3 meses e algún facía 48 horas que o asinara; non lle parece de recibo que eses traballadores opinaran sobre o documento.
- Non se tivo en conta ningunha das achegas do BNG e, ademais, os feitos do goberno municipal son despedimentos (na brigada de limpeza de praias, de técnicos de Servizos Sociais que logo houbo que indemnizar, ou de socorristas) pois non se admite a rebeldía; castigos soterrados a empregados trasladándoos a outras dependenzas, ou desaproveitar a traballadores de valía probada.

D<sup>a</sup>. María José Maneiro Quintáns principia afirmando que tratar este asunto lles produce unha gran satisfacción pois a RPT é un documento de organización do persoal de obrigada existencia para os concellos, porque se trata dun documento moi demandado polos traballadores, porque vai tentar dar solución a problemas existentes e, finalmente, porque os traballadores o merecen. Explica que a RPT se aprobou por unanimidade na Mesa Xeral e case cun 80 % de votos a favor na votación realizada entre os empregados municipais.

A Sra. Maneiro Quintáns detalla que coa RPT se organizan os traballadores, se avalían os postos obxectivamente e se vai facer posible o proceso de consolidación de persoal laboral temporal que realiza funcións estruturais superiores ás do posto que desempeñan, e están inxustamente retribuídas, ou que ocupan postos de funcionarios.

Respondéndolle á Sra. Hermo García, D<sup>a</sup>. María José Maneiro Quintáns afirma que desigualdade é a que existe neste momento e que na RPT os postos se valoran obxectivamente aplicando criterios e ponderacións idénticas para todos. En relación co diferente xeito de recoller as titulacións no documento, sinala que hai unhas equivalencias determinadas polo Ministerio de Educación que se verificarán en cada caso polos tribunais de selección.

En alusión ao manifestado pola Sra. Torres Parada, indica que o 80 % dos empregados municipais votaron a favor da RPT, que o documento se consensuou coa Mesa Xeral e cos traballadores de xeito individual, facendo todos achegas; despois da aprobación inicial os traballadores poderán formular as alegacións que consideren.

Contestando ao dito pola Sra. Franco Pouso, apunta que falou de todo menos da RPT e que se as súas achegas non figuran no documento é porque non as realizou. En relación coa situación do persoal das Casas da Cultura, sinala que foron os gobernos nos que participou o BNG quen a crearon, e pídelles voceira nacionalista que propoña unha solución e o grupo de goberno deixará que a aproben; tamén se pregunta se pretenden crear persoal indefinido de modo ilegal. Finalmente, di que hai que defender aos traballadores que cumpren e que os despedimentos se fixeron por mor de faltas continuadas.

D<sup>a</sup>. Josefa M<sup>a</sup> Hermo García reitera que nun documento da RPT se fai referencia a unha determinada titulación e noutro documento non se aplica esa titulación. Tamén reitera que vai ocorrer naqueles casos nos que para o posto se indicou a titulación “diplomado universitario” cando o persoal acredite un certificado de profesionalidade do MECES e se converten automaticamente nun grupo “A1”

Engade que no documento da RPT tamén hai páxinas duplicadas.

D<sup>a</sup>. M<sup>a</sup> Asunción Torres Parada non fai uso da súa quenda de palabra.

D<sup>a</sup>. María Ánxela Franco Pouso pídelle á Sra. Maneiro Quintáns que lle diga cantos recén contratados votaron a RPT; explica que o resultado foi de 40 votos a favor, 13 en contra e 2 abstencións e ela está segura de que ningún dos contratados temporalmente votou en contra.

Prosegue a súa intervención afirmando que no concello hai traballadores que non ten a base de cotización necesaria para acadar a pensión mínima. En relación aos despedimentos, sinala que non o di o seu grupo senón o xulgado pois, p.e. á técnico de Servizos Sociais despedírona cando podían readmitila.

A Sra. Franco Pouso conclúe a súa intervención pedindo que se lle busque unha solución a persoas como as das Casas da Cultura, o enterrador ou as de limpeza sen que teñan que acudir ao xulgado. Engade que algún deses traballadores non gaña nin sequera para pagar a cota de autónomos.

D<sup>a</sup>. María José Maneiro Quintáns, en alusión ao dito pola voceira socialista, sinala que para cada posto se determina unha titulación e, ademais, hai unhas equivalencias de títulos.

Respecto do manifestado pola voceira do BNG, di que esta non a entende, pois a única maneira de poder declarar a alguén persoal indefinido é por sentenza xudicial ou a través dunha resolución ilegal.

Non habendo intervencións, o Sr. Alcalde- Presidente dá paso á votación da proposta.

En consecuencia, o Pleno Corporativo, trala **votación ordinaria e por sete (7) votos a favor (7 PP) e con seis (6) abstencións (2 PSDG- PSOE+ 2 Portodos+ 2 BNG)**, polo tanto co **quorum da maioría absoluta**, sendo **trece (13)** o número legal de membros da Corporación, **APROBA a proposta** nos seus propios termos.

### **3. SOLICITUDE DE PARTICIPACIÓN NO POS+ 2018 ADICIONAL 1/2018.**

O Sr. secretario dá lectura á proposta da Alcaldía, que é do seguinte teor literal:

#### **"PROPOSTA DA ALCALDÍA- PRESIDENCIA**

**D. José Luis Oujo Pouso**, Alcalde- Presidente do Concello de Porto do Son, no exercicio das facultades que lle confire o artigo 21 da Lei 7/1985, de 2 de abril, reguladora das bases do réxime local, propón ao Pleno da Corporación a adopción do seguinte acordo, non obstante resolverá o que estime conveniente:



O Pleno da Deputación Provincial da Coruña aprobou na súa sesión do 16 de maio de 2018 aprobou un expediente de modificación de crédito orzamentario para realizar unha maior achega ao Plan provincial de cooperación ás obras e servizos de competencia municipal (Plan único de concellos) "POS+ 2018", cuxas bases reguladoras se publicaron no BOP nº 188 do 03/10/2017.

Por medio da súas circulares do 25 de maio e 4 de xuño de 2018, infórmase de que a cantidade adicional ao POS+ 2018 asignada ao Concello de Porto do Son, achega denominada "POS+ Adicional 1/2018" ascende ao importe de 187.107,13 euros.

Mediante o decreto da Alcaldía núm.436/2018, do 13 de xuño, resolveuse financiar con parte da achega do POS+ Adicional 1/2018 os seguintes investimentos incluídos no Plan Complementario do POS+ 2018 "Acondicionamento da parcela da escola unitaria de Novás para aparcadoiro", "Beirarrúa entre a Rúa Redeiras e a Rúa Sardiñeira – Portosín" e "Beirarrúa en Caamaño", restando un total de 45.360,16 euros que se pode destinar ao financiamento de novos investimentos financeiramente sostibles.

Resulta preciso, pois, determinar os investimentos novos que se pretende incluír no POS+ Adicional 1/2018 e adoptar os demais acordos precisos para a tramitación do referido plan adicional.

Visto canto antecede, **ACORDA:**

"1.- "Participar no **Plan provincial de cooperación ás obras e servizos de competencia municipal (Plan único de concellos) POS+ 2018 Adicional 1/2018** da Deputación Provincial da Coruña, cuxas Bases se coñecen e aceptan na súa totalidade, e solicitar a aplicación da maior achega provincial asignada aos obxectos que se indican a continuación:

**A) Financiamento do pago a provedores:**

Financiamento das facturas pendentes de pago con provedores de importe igual ou superior a 100 € (IVE incluído), que teñen entrada no Rexistro Xeral do concello ata o 31 de decembro de 2017 (este incluído);

**(Só para o caso de concellos que non presentaron solicitude na 1ª fase deste Plan cuxo prazo rematou o 8 de xuño de 2018)**

	Capítulo II	Capítulo VI	Total
Mayor achega provincial aplicada ao financiamento de pago a provedores	---	---	---
<b>Subtotal pago a provedores</b>	---	---	---

**B) Financiamento de todos os investimentos financeiramente sostibles que se solicitan nesta 2ª fase do Plan, tanto dos previstos no Plan Complementario como dos novos:**

**(Deberán incluírse unicamente os investimentos que non foron solicitados na 1ª fase deste Plan cuxo prazo rematou o 8 de xuño de 2018)**

Investimentos financeiramente sostibles que se solicitan nesta 2ª fase do Plan			Financiamento dos investimentos		
Procede do POS+ 2018 Complementari o SI / NON	Denominación da obra ou subministración	Grupo de programa	Deputación	Concello	Orzamento total
NON	Humanización da Rúa Cruceiro de Santa Irene	1532	45.360,16 €	0,01 €	45.360,17 €
	<b>Subtotal investimentos financeiramente sostibles</b>		45.360,16 €	0,01 €	45.360,16 €

Aprobar os proxectos das novas obras ou os pregos das novas subministracións incluídos no POS+ Adicional 1/2018 que se relacionan nesta táboa.

**C ) Resumo:**

SUBTOTALS	Deputación	Concello	Total
A- PAGO A PROVEDORES DESTA 2ª FASE DO PLAN	---		---
B- INVESTIMENTOS FINANCEIRAMENTE SOSTIBLES A INCLUIR NESTA 2ª FASE DO PLAN	45.360,16 €	0,01 €	45.360,17 €
SUBTOTAL	45.360,16 €	0,01 €	45.360,17 €
IMPORTE DA ACHEGA PROVINCIAL XA APLICADA, DE SER O CASO, NA 1ª FASE DO PLAN	141.746,97 €		141.746,97 €
TOTAL	187.107,13 €	0,01 €	187.107,14 €

2.- Declarar que o concello ten a dispoñibilidade dos terreos, augas e servidumes para a execución dos investimentos, e que ten resolto todo o relacionado coas concesións e autorizacións administrativas que legalmente sexan necesarias.

3.- Declarar que o concello ten crédito, de ser o caso, que se compromete a incluír no orzamento municipal os fondos necesarios, para facer fronte á achega municipal aos investimentos incluídos no POS+ Adicional 1/2018, se o concello voluntariamente realiza algunha achega ao seu financiamento.

4.- Solicitar da Deputación Provincial da Coruña a delegación neste concello da contratación e execución das obras ou subministracións incluídas no Plan, que se entenderá aceptada si esta se produce efectivamente.

5.- Declarar que o concello non solicitou nin percibiu ningunha subvención doutras Administracións públicas para o financiamento das distintas actuacións incluídas neste Plan, e no caso de que existan axudas ou subvencións concorrentes doutras Administracións, achégase o detalle de cada unha delas, acreditándose que a súa suma total non supera o 100% do seu importe.

6.- Autorízase á Deputación Provincial da Coruña a obter as certificacións da Axencia Estatal de Administración Tributaria e da Tesourería da Seguridade Social nas que se acredite que o concello está ao corrente nas súas obrigas tributarias e coa Seguridade Social.

7.- Facultar expresamente á Alcaldía para todo o relacionado coa tramitación e xestión do presente acordo e o correspondente expediente.”

Porto do Son, 28 de xuño de 2018.

O Alcalde- Presidente,  
Asdo. José Luis Oujo Pouso.”

Dª. Josefa Mª Hermo García non fai uso da súa quenda de palabra.

Dª. Mª Asunción Torres Parada móstrase de acordo con que se faga transitible a Rúa Cruceiro de Santa Irene se adecúe para o tránsito de peóns e vehículos. En relación con esta obra, pregunta se hai informes técnicos avaliando os posibles riscos para as estruturas das vivendas asentadas sobre a rocha; engade que no pasado outros gobernos tentaron executar a obra pero



tiveron que paralizala porque os técnicos advertiron de riscos para as vivendas, e pide que non suceda como na obra do Museo do Mar ou na da estrada provincial de San Pedro de Muro.

D<sup>a</sup>. María Ánxela Franco Pouso di que coincide co dito pola voceira de Portodos e que lle parece bo que se faga útil para a circulación a rúa Cruceiro de Santa Irene. Detalla que, no seu momento, pediran un orzamento para acometer a actuación pero advertíronlles de que podían existir riscos para as vivendas lindeiras, polo que pide que se tomen todas as cautelas.

D<sup>a</sup>. María José Maneiro Quintáns di que todos están de acordo con que se trata dunha obra moi necesaria e recoñece que eliminar a rocha ten unha especial dificultade técnica. Así mesmo, explica que se consultou con técnicos e que lles indicaron que había un sistema de corte da pedra (conte con fío) que non producía vibracións. Ademais, para evitar riscos, levantárase unha acta notarial antes de iniciar a obra.

Non habendo máis intervencións, o Sr. Alcalde- Presidente dá paso á votación da proposta.

En consecuencia, o Pleno Corporativo, trala **votación ordinaria e por nove (9) votos a favor (7 PP+ 2 BNG) e con catro (4) abstencións (2 PSdG- PSOE+ 2 Portodos)**, polo tanto co **quorum da maioría absoluta**, sendo **trece (13)** o número legal de membros da Corporación, **APROBA a proposta** nos seus propios termos.

#### **4. INCORPORACIÓN AO INVENTARIO DE BENS DOS CENTROS DE SAÚDE DE PORTO DO SON E XUÑO.**

O Sr. secretario dá lectura á proposta da Alcaldía, que é do seguinte teor literal:

##### **"PROPOSTA DA ALCALDÍA- PRESIDENCIA**

**D. José Luis Oujo Pouso**, Alcalde- Presidente do Concello de Porto do Son, no exercicio das facultades que lle confire o artigo 21 da Lei 7/1985, de 2 de abril, reguladora das bases do réxime local, propón ao Pleno da Corporación a adopción do seguinte ACORDO, non obstante resolverá o que estime conveniente:

Visto que o Concello de Porto do Son está a tramitar coa Consellería de Sanidade e o Servizo Galego de Saúde (SERGAS) un convenio para a cesión ao SERGAS dos centros de saúde de titularidade municipal e que para iso resulta imprescindible que os bens a ceder estean inscritos no Rexistro da Propiedade.

Visto que o Concello de Porto do Son é propietario dos centros de saúde de Porto do Son e Xuño e que a titularidade de ambos os dous inmobles non figura inscrita no Rexistro da Propiedade.

Visto que o Concello de Porto do Son dispón dun Inventario de Bens Municipais vixente, se ben non convenientemente actualizado, resulta necesario, para tramitar a inscrición rexistral da titularidade municipal dos centros de saúde de Porto do Son e Xuño, proceder con carácter previo á súa incorporación ao inventario citado.

Considerando que o art. 278 da Lei 5/1997, do 22 de xullo, de Administración Local de Galicia (LALG) obriga ás Entidades Locais a “*formar inventario valorado de todos os bens e dereitos que lles pertencen*”, obriga esta reiterada polo art. 32.1 da Lei 33/2003, do 3 de novembro, de patrimonio das Administracións Públicas.

Visto canto antecede, **RESOLVE:**

**Único.-** Acordar a incorporación ao Inventario de Bens do Concello de Porto do Son dos bens inmoables que se describe a continuación:

1) Centro de Saúde de Porto do Son.

- Nome: Centro de Saúde de Porto do Son.
- Natureza do ben: ben de dominio público.
- Situación: Rúa Campo a través, 6 – Porto do Son.
- Referencia catastral: 9403501MH9390S0001GI.
- Lindeiros: Norte: Rúa Campo a Través; Sur: vía pública; Leste: Rúa Cruceiro de Santa Irene; Oeste: Paseo do Brañón.
- Superficie: 525,00 m2 (superficie de solo); 1.270,00 m2 (superficie construída).
- Descrición: edificación destinada á prestación de servizos sanitarios de atención primaria.
- Título: obra nova rematada.
- Inscripción no Rexistro da Propiedade: non inscrito.
- Destino: servizo público sanitario.
- Gravames e cargas: sen cargas.
- Data de adquisición: 1.993 (construción da edificación principal).
- Valoración: 492.918,76 euros.
- Rendas que produce: ningunha.

2) Centro de Saúde de Xuño.

- Nome: Centro de Saúde de Xuño.
- Natureza do ben: ben de dominio público.
- Situación: Trasdoanes, 22 – Xuño (Porto do Son).
- Referencia catastral: 001800700MH92B0001QO.
- Lindeiros: Norte: vía pública; Sur: vía pública; Leste: Dolores Sieira Bandín; Oeste: vía pública.
- Superficie: 2.553,00 m2 (superficie de solo); 579,00 m2 (superficie construída).
- Descrición: edificación destinada á prestación de servizos sanitarios de atención primaria.
- Título: obra nova rematada.
- Inscripción no Rexistro da Propiedade: non inscrito.
- Destino: servizo público sanitario.
- Gravames e cargas: sen cargas.



- Data de adquisición: 1.986 (construción da edificación principal).
- Valoración: 339.793,35 euros.
- Rendos que produce: ningunha.

Porto do Son, 6 de xullo de 2018.

O Alcalde- Presidente,  
Asdo. José Luis Oujo Pouso.”

D<sup>a</sup>. Josefa M<sup>a</sup> Hermo García sinala que tanto o PSOE como os outros grupos políticos levan tempo reclamando o Inventario de Bens. Tamén lle chama a atención que haxa Inventario de Bens pero que non estea actualizado, polo que pregunta cando se actualizará convenientemente se cando poderán velo.

D<sup>a</sup>. M<sup>a</sup> Asunción Torres Parada entende que a incorporación ao inventario dos centros de saúde é obrigatorio para logo inscribilos no Rexistro da Propiedade e, posteriormente, formalizar a súa cesión ao Sergas, que asumirá os seus custos de mantemento. Por ese motivo, adianta o voto a favor do seu grupo.

D<sup>a</sup>. María Ánxela Franco Pouso alédase de que se faga cargo dos centros de saúde quen ten competencias para iso, pois o concello leva moito tempo soportando unhas cargas que non son dos veciños.

Por outra banda, sinala que levan máis de 5 anos reclamando que se faga un Inventario de Bens adecuado, pois por el pagáronse máis de 18.000 euros procedentes da Deputación Provincial. Engade que o goberno municipal era sabedor de que o inventario estaba mal feito pero o Pleno avalouno para que a empresa que o elaborou cobrase.

D<sup>a</sup>. María José Maneiro Quintáns explica que a proposta de acordo ten por obxecto facer posible a cesión dos centros de saúde de titularidade municipal ao Sergas. Eses centros, di, supóñenlle un custo anual ao concello moi importante.

Non habendo mais intervencións, o Sr. Alcalde- Presidente dá paso á votación da proposta.

En consecuencia, o Pleno Corporativo, trala **votación ordinaria e por once (11) votos a favor (7 PP+ 2 PSdG- PSOE+ 2 BNG) e con dúas (2) abstencións (2 Portodos)**, polo tanto co **quorum da maioría absoluta**, sendo **trece (13)** o número legal de membros da Corporación, **APROBA a proposta** nos seus propios termos.

## **5. APROBACIÓN DUN CONVENIO DE COLABORACIÓN COA EPE PORTOS DE GALICIA PARA EXECUTAR A ACTUACIÓN “ACONDICIONAMENTO DO BORDO INTERIOR DE PORTO DO SON”.**

O Sr. secretario dá lectura á proposta da Alcaldía, que é do seguinte teor literal:

### **“PROPOSTA DA ALCALDÍA- PRESIDENCIA**

**D. José Luis Oujo Pouso**, Alcalde- Presidente do Concello de Porto do Son, no exercicio das facultades que lle confire o artigo 21 da Lei 7/1985, de 2 de abril, reguladora das bases do réxime local, propón ao Pleno da Corporación a adopción do seguinte ACORDO, non obstante resolverá o que estime conveniente:

Visto o “Convenio de colaboración entre a EPE Portos de Galicia e o Concello de Porto do Son para a conservación, mantemento e colaboración na execución das obras de acondicionamento do bordo interior de Porto do Son”, polo que Portos de Galicia se compromete a executar a obra “Acondicionamento do bordo interior de Porto do Son”, que ten por obxecto reordenar o tráfico rodado, renovar firmes e pavimentos, o axardinamento e colocación de mobiliario urbano e a renovación dos servizos públicos de abastecemento de auga, saneamento de augas pluviais e iluminación pública.

Considerando que o art. 26.1.a) da Lei 7/1985, do 2 de abril, reguladora das bases do réxime local lle impón a todos os concellos a prestación, entre outros, dos servizos públicos de “*iluminación pública, (...), abastecemento domiciliario de auga potable, alcantarillado, acceso aos núcleos de poboación e pavimentación das vías públicas*”.

Considerando do maior interese para a satisfacción do interese público municipal a execución da obra “Acondicionamento do bordo interior de Porto do Son” pola entidade pública empresarial Portos de Galicia, financiada integramente por esa entidade, coa finalidade de reordenar boa parte do ámbito do dominio público portuario de Porto do Son, así como parte das vías públicas municipais adxacentes, estímase adecuado e aprobar o convenio interadministrativo citado con carácter previo á súa subscrición.

Visto canto antecede, **RESOLVE:**

**Primeiro.-** Aprobar o “Convenio de colaboración entre a EPE Portos de Galicia e o Concello de Porto do Son para a conservación, mantemento e colaboración na execución das obras de acondicionamento do bordo interior de Porto do Son” remitido pola entidade pública empresarial Portos de Galicia.

**Segundo.-** Facultar ao Alcalde- Presidente para a realización de cantos trámites e xestións sexan precisos para o cumprimento do convenio cuxa subscrición se aproba.

**Terceiro.-** Dar conta deste acordo a Portos de Galicia para o seu coñecemento e aos efectos oportunos.

Porto do Son, 4 de xullo de 2018.

O Alcalde- Presidente,  
Asdo. José Luis Oujo Pouso.”



D<sup>a</sup>. Josefa M<sup>a</sup> Hermo García non fai uso da súa quenda de intervención.

D<sup>a</sup>. M<sup>a</sup> Asunción Torres Parada di que con respecto a esta obra cabe preguntarse se o concello busca a consolidación de postos de traballo ou só quere ser un bonito escaparate para os visitantes de verán. Continúa afirmando que non lle parece que a obra que ampara o convenio estea xustificada no actual contexto económico e social pois as verdadeiras necesidades dos veciños non están cubertas, xa que faltan postos de traballo, investimento en servizos sociais, en sanidade ou en educación.

A voceira de Portodos considera que tanto o concello como a Consellería do Mar debían investir no reforzo do marisqueo e do cerco, no saneamento da ría e en solucionar a contaminación do mar, tal e como advertiu o Comisario Europeo do Mar.

Prosegue afirmando que se trata dunha obra boa en momentos de bonanza económica pero non agora e que con estas actuacións non se está a mirar polos veciños senón só polos turistas. Engade que o máis importante é acadar que os veciños queiran vivir aquí todo o ano e crear postos de traballo.

D<sup>a</sup>. María Ánxela Franco Pouso di que comparte boa parte das afirmacións da Sra. Torres Parada pois o concello perde poboación e non se está a facer nada ningún investimento para mellorar as condicións de vida dos veciños.

O Sr. Alcalde- Presidente pídelo á voceira do BNG que se cinga ao asunto da orde do día e advirte ao público presente de que non pode intervir durante o debate.

A Sra. Franco Pouso sinala que o Sr. Alcalde ten un cargo no PP como responsable de pesca e, podendo investir na pesca, fai unha "fachada" e recorda que xa o anterior goberno municipal do PP desbotou unha obra na fachada marítima para tentar facer outra maior. Tamén recorda que cando ela gobernaba e o Sr. Alcalde era o presidente da asociación de empresarios reuníronse con eles para tratar destes investimentos, mentres que agora non sucede así.

Prosegue indicando que o investimento pretendido é electoralista, pois no ano 2018 non se prevé executar nada, no 2019 un millón de euros (despois das eleccións) e o resto en 2020. Indica que, de executarse, os hostaleiros terían que aboar cuantiosas taxas a Portos de Galicia e, ademais, se xerarán problemas de atoamentos no saneamento.

D<sup>a</sup>. María José Maneiro Quintáns móstrase asombrada coas intervencións, pois todos os grupos políticos se cansaron de prometer un investimento na fachada marítima pero ningún foi quen de facela. Apunta que o PSOE non di nada; a Sra. Torres Parada bótalle a culpa do paro no concello á obra da fachada marítima, cando o responsable foi o goberno central socialista; e, en canto á Sra. Franco Pouso, o investimento na fachada marítima foi un dos motivos para presentarlle unha moción de censura ao ex –compañeiro da Sra. Torres Parada. Engade que todos viñeron con fume pero o goberno municipal vén con feitos.

Continúa a Sra. Maneiro Quintáns sinalando que todos desfrutarán do investimento, veciños e turistas, e que se trata dun proxecto moi demandado que financiará integramente Portos de Galicia. Remata agradecéndolle ao presidente da Xunta de Galicia, Sr. Núñez Feijóo a súa implicación na aprobación do convenio para financiar o investimento, que axiña se aprobará polo Consello da Xunta e se presentará ao público.

D<sup>a</sup>. Josefa M<sup>a</sup> Hermo García pide intervir por alusións e o Sr. Alcalde- Presidente indícalle que non procede.

A Sra. Hermo García afirma que ten dereito a intervir pois así o prevé o Regulamento orgánico.

O Sr. Alcalde- Presidente reitéralle que non procede e indícalle a súa quenda á voceira de Portodos.

Fórmase un balbordo.

D. Luis García Gaciño pide intervir e o Sr. Alcalde- Presidente indícalle que non ten a palabra, dándolle a quenda á voceira de Portodos.

D<sup>a</sup>. M<sup>a</sup> Asunción Torres Parada, en relación co dito pola Sra. Maneiro Quintáns, sinala que a fachada marítima non é a causa da falla de emprego senón o goberno municipal, e recorda que cando o Sr. Alcalde presidía a asociación de empresarios era o máximo abandeirado do polígono industrial pero, á data, descoñecen que fixo para acadalo.

A Sra. Torres Parada afirma que o investimento da fachada marítima é o exemplo do modo de gobernar do goberno municipal: para o escaparate e esquecendo as necesidades da xente. Engade que para o seu grupo sería máis importante que os 3 millóns de investimento se destinasen a mellorar o saneamento no concello e na ría xa que, p.e., souberon que a EDAR do Loreto non dá abasto no verán e cando se supera a súa capacidade verte ao mar.

Intervén o Sr. Alcalde- Presidente para preguntarlle á voceira de Portodos como é que non pon unha denuncia se hai vertidos na EDAR do Loreto, que xestiona Augas de Galicia. Engade que se é certo o que di debe denunciálo e que debe comprobar os feitos antes de lanzar unha acusación tan grave.

A Sra. Torres Parada di que será o Sr. Alcalde quen debe facer as comprobacións oportunas, e pídelle que sexa serio e supervise as obras ao seu cargo.

O Sr. Alcalde- Presidente indica que non ten coñecemento de que existan os vertidos denunciados.

D<sup>a</sup>. M<sup>a</sup> Asunción Torres Parada cre que son certos os feitos indicados, que puxeron no seu coñecemento, e engade que se trata dun problema común no país: hai máis depuradoras ca fai 50 anos pero tamén hai máis verteduras.

D<sup>a</sup>. María Ánxela Franco Pouso recoñece que un dos motivos da moción de censura ao anterior goberno do PP foi a obra da fachada marítima, pois estaba comprometida e rexeitouse. Tamén sinala que cando o seu grupo accedeu ao goberno municipal non había financiamento, pero agora si pois entre os gobernos do PP sempre hai cartos. Engade que, o certo, é que no ano 2018 o investimento na obra é de 0 euros.

Fai uso da palabra o Sr. Alcalde- Presidente para explicar que iso se debe a que hai que licitar a obra e non se vai contratar no 2018.

D<sup>a</sup>. María Ánxela Franco Pouso cre que no ano 2019, á parte dos carteis e do proxecto, tampouco se vai investir nada na obra, e engade que a credibilidade do PP é escasa.

Doutro lado, a voceira nacionalista suxire que goberno municipal revise o que factura Augas de Galicia pois dise que de noite apagan os puntos de bombeo para que non entren as augas á EDAR e verten aos regatos. Pide que se controlen eses feitos pois saben que os comete.



Remata afirmando que non sabe para que quere o goberno municipal a fachada marítima de Porto do Son pois na praia das Furnas xa puxo un banco, fixo un colector, colocou un pasarela, etc. Tamén di que deben limpar as rutas de sendeirismo que fixeron e que, ese tipo de actuacións, son a "fachada marítima" do goberno municipal.

O Sr. Alcalde- Presidente apunta que, fagan o que fagan, todo está mal, sexa a escola infantil ou a ludoteca. Engade que os veciños toman nota da actuación dos grupos da oposición e así lles vai, e cualifica ese xeito de proceder como pésimo. Dirixíndose ao Sr. García García, indícalle que no seguinte punto da orde do día se vai tratar sobre a EDAR de Queiruga e pídelles que tome nota.

Fórmase un balbordo e o Sr. Alcalde dispón un receso na sesión.

[Entre as 21:25 horas e as 21:35 horas suspéndese a sesión.]

Concluído o receso, intervén o Sr. Alcalde- Presidente para pedirle aos corporativos que se respecten nas súas intervencións e non se insulten, desenvolvéndose a sesión como o acto solemne que é e que importante para os veciños.

Non habendo mais intervencións, o Sr. Alcalde- Presidente dá paso á votación da proposta.

En consecuencia, o Pleno Corporativo, trala **votación ordinaria e por sete (7) votos a favor (7 PP) e con seis (6) abstencións (2 PSdG- PSOE+ 2 Portodos+ 2 BNG)**, polo tanto co **quorum da maioría absoluta**, sendo **trece (13)** o número legal de membros da Corporación, **APROBA a proposta** nos seus propios termos.

## **6. APROBACIÓN DUN CONVENIO DE COLABORACIÓN COA EPE AUGAS DE GALICIA PARA EXECUTAR A ACTUACIÓN "SANEAMENTO E DEPURACIÓN EN QUEIRUGA. PORTO DO SON".**

O Sr. secretario dá lectura á proposta da Alcaldía, que é do seguinte teor literal:

### **"PROPOSTA DA ALCALDÍA- PRESIDENCIA**

**D. José Luis Oujo Pouso**, Alcalde- Presidente do Concello de Porto do Son, no exercicio das facultades que lle confire o artigo 21 da Lei 7/1985, de 2 de abril, reguladora das bases do réxime local, propón ao Pleno da Corporación a adopción do seguinte ACORDO, non obstante resolverá o que estime conveniente:

Visto o "Convenio de colaboración entre a entidade pública empresarial Augas de Galicia e o Concello de Porto do Son para a execución da actuación "Saneamento e depuración en Queiruga. Porto do Son (A Coruña)", polo que Augas de Galicia se compromete a executar as obras de

construción dunha depuradora en Queiruga e unha rede de colectores que dea servizo aos núcleos desa parroquia e a súa posterior entrega ao concello para a incorporación ao servizo público.

Considerando que o art. 25.2 c) LBRL prevé, entre as materias nas que os concellos exercerán competencias as de "(...) *evacuación e tratamento de augas residuais*" e que o art. 5.1 Lei 9/2010, do 4 de novembro, de augas de Galicia lle atribúe a aquelas Entidades Locais as competencias relativas a:

"c) *O tratamento de augas residuais, respecto ás instalacións non comprendidas no ámbito do artigo 32 da presente lei, ou respecto a aquelas sobre as cales os concellos non exerciten a opción prevista na disposición transitoria quinta*".

Considerando do maior interese para a satisfacción do interese público municipal a execución dunha depuradora en Queiruga e da rede de colectores que preste o servizo de saneamento aos núcleos desa parroquia pola entidade pública empresarial Augas de Galicia, financiada integramente por esa entidade, coa finalidade de prestar e completar o servizo municipal de saneamento e tratamento da augas residuais, estímase adecuado e aprobar o convenio interadministrativo citado con carácter previo á súa subscrición.

Visto canto antecede, **RESOLVE:**

**Primeiro.-** Aprobar o "Convenio de colaboración entre a entidade pública empresarial Augas de Galicia e o Concello de Porto do Son para a execución da actuación "Saneamento e depuración en Queiruga. Porto do Son (A Coruña)" remitido pola entidade pública empresarial Augas de Galicia.

**Segundo.-** Facultar ao Alcalde- Presidente para a realización de cantos trámites e xestións sexan precisos para o cumprimento do convenio cuxa subscrición se aproba.

**Terceiro.-** Dar conta deste acordo a Augas de Galicia para o seu coñecemento e aos efectos oportunos.

Porto do Son, 3 de xullo de 2018.

O Alcalde- Presidente,  
Asdo. José Luis Oujo Pouso."

D<sup>a</sup>. Josefa M<sup>a</sup> Hermo García expresa que no grupo socialista consideran necesario e imprescindible un servizo básico como é o de saneamento, que debe ser obrigatorio e non o logro dun partido concreto.

En relación co asunto, apunta que o saneamento en Queiruga non estará dispoñible ata o 2020, polo que lle dá a noraboa ao goberno municipal. Conclúe afirmando que non será polo PSOE que Queiruga quede sen saneamento.

D<sup>a</sup>. M<sup>a</sup> Asunción Torres Parada agarda que na EDAR que se implante en Queiruga non acontezan sucesos como aos que aludiu no anterior punto da orde do día e que matizou a Sra. Franco Pouso.

D<sup>a</sup>. María Ánxela Franco Pouso di que a depuración das augas residuais é fundamental para afincar poboación e darlle servizo aos veciños. Referíndose ao contido do convenio que se pretende aprobar, sinala que nel se require a posta a disposición dos terreos necesarios para a obra, polo que pregunta se xa están mercados e onde se vai construír a EDAR.



Por outra banda, móstrase satisfeita de que se implante unha EDAR que no 2021 lle vai dar servizo a 847 veciños e que representa un investimento duns 2 millóns de euros, pero recorda que o grupo de goberno impediu que prosperase unha moción do BNG relativa a unha EDAR que vai servir a 1.641 persoas e que só vai levar pouco máis de 200.000 euros de investimento.

Conclúe a súa intervención adiantando o voto a favor do seu grupo se lle contestan as preguntas que formulou, se ben ata en tanto, absterase. Engade que van seguir reivindicando que non é suficiente un investimento de 200.000 euros para unha EDAR que verte ao río Sieira.

D<sup>a</sup>. María José Maneiro Quintáns contéstalle á voceira do BNG que a EDAR de Caamaño- Xuño aínda non se puxo en servizo pero, segundo o criterio desa concelleira, vai funcionar defectuosamente pois o investimento foi insuficiente. Engade que a Sra. Franco Pouso sabe que esa EDAR xa estaba construída e que agarda que se desculpe cando entre en funcionamento.

Aludindo ao manifestado pola Sra. Hermo García, sinala que para esa concelleira o saneamento non é un logro, mais para o goberno municipal si e, ademais, constitúe o seu principal compromiso cos veciños. Engade que son un logro os investimentos de Augas de Galicia no concello.

En relación coa obra que á que se refire o convenio de colaboración, explica que supón máis de 2 millóns de euros que vai financiar integramente a Xunta de Galicia, administración á que, doutro lado, agradece os investimentos que anunciados en 2018, como a rotonda de Portosín, os novos pantaláns do peirao de Portosín, a EDAR de Xuño ou a EDAR de Queiruga. Conclúe afirmando que hai que seguir traballando na mesma liña.

D<sup>a</sup>. Josefa M<sup>a</sup> Hermo García di que cada vez está máis convencida de que á Sra. Maneiro Quintáns o que lle entra por un oído lle sae polo outro ou o terxiversa, pois ela dixo na súa primeira quenda de palabra que o saneamento é un servizo básico.

A Sra. Hermo García sinala que para o goberno municipal semella que a Xunta de Galicia representa a panacea, pero o saneamento de Xuño- Caamaño non tería levado a cabo sen a achega da Deputación Provincial.

Dirixíndose ao Sr. García García, a voceira socialista, di que Queiruga non terá saneamento ata o ano 2021.

Conclúe a súa intervención manifestando que semella que só existen Porto do Son e Portosín, pois pouco queda para as parroquias.

D<sup>a</sup>. M<sup>a</sup> Asunción Torres Parada pide que lles aclaren cal vai ser a ubicación da EDAR.

O Sr. Alcalde- Presidente fai uso da palabra para contestar, en relación coa compra de terreos, que xa hai acordos cos veciños e que só falta pagarlles. Tamén explica que, en principio, se van facer 2 bombeos, en Río Maior e en Porto Nadelas e, se non hai problemas coa autorización de vertidos, a EDAR construírase en Punxeiros; se non se autorizan os vertidos nese punto, poderíase trasladar a EDAR a Río Maior e o bombeo a Punxeiros.

D<sup>a</sup>. Josefa M<sup>a</sup> Hermo García pregunta se o acordo asinado é para a compra dos terreos necesarios.

O Sr. Alcalde- Presidente responde que o convenio ten por fin implantar o saneamento e unha EDAR.

D<sup>a</sup>. Josefa M<sup>a</sup> Hermo García pregunta se hai acordos cos veciños.

O Sr. Alcalde- Presidente pídelle ao Sr. secretario que informe ao respecto e este explica que hai subscritos cos veciños uns acordos previos á expropiación dos terreos necesarios e que o custo total é duns 64.000 euros.

D<sup>a</sup>. M<sup>a</sup> Asunción Torres Parada pregunta porque se iniciou un procedemento expropiatorio.

O Sr. secretario explica que ese procedemento xa estaba iniciado cando el chegou ao Concello de Porto do Son e que o motivo puido ser unha indicación de Augas de Galicia. No fondo, di, ese tipo de acordo é similar a unha compravenda.

O Sr. Alcalde- Presidente indica que hai acordo coa totalidade dos veciños que se verían afectados polas obras.

D<sup>a</sup>. María Ánxela Franco Pouso di que a obra que recolle o convenio de colaboración é para o escaparate, que ao seu custo hai que sumarlle os 64.000 euros dos terreos e que nos Orzamentos do concello non se consignaron fondos para ese fin.

Conclúe a súa intervención apuntando que lle pareceu entender que a situación da EDAR dependerá da autorización dos vertidos intermitentes ao regato.

O Sr. Alcalde- Presidente intervén para indicar que a EDAR se ubicará onde informen os técnicos e, como xa indicou, se o organismo responsable de autorizar os vertidos non permite a EDAR en Punxeiros, situarase ne Río Maior pero por causa do concello Queiruga non vai quedar sen saneamento.

D<sup>a</sup>. María Ánxela Franco Pouso afirma que a Deputación Provincial leva investido en saneamento moito máis que a Xunta de Galicia pero o Sr. Alcalde non o agradece. Tampouco entende como se pode facer un recordatorio de investimentos da Xunta de Galicia en Porto do Son cando, p.e., a rotonda de Portosín vai custar máis que o arranxo da rúa; di que o recordatorio o é de "escaparatismo".

Remata a súa intervención adiantando o voto favorable do seu grupo á proposta, aínda que non lle parece posible que unha EDAR na que se invisten 200.000 euros funcione coma outra na que se empregan máis de 2 millóns.

D<sup>a</sup>. María José Maneiro Quintáns sinala que están a debater acerca dun convenio, non dun panfleto, e que se trata dun documento oficial que ten unha validez. Conclúe reiterando que se trata de investimentos bos para o concello e sinte que aos grupos da oposición lles molesten.

Non habendo mais intervencións, o Sr. Alcalde- Presidente dá paso á votación da proposta.

En consecuencia, o Pleno Corporativo, trala **votación ordinaria e por unanimidade (7 PP+ 2 PSdG- PSOE+ 2 Portodos+ 2 BNG)**, polo tanto co **quorum da maioría absoluta**, sendo **trece (13)** o número legal de membros da Corporación, **APROBA a proposta** nos seus propios termos.



## **7. APROBACIÓN DO PLAN ESTRATÉXICO DE SUBVENCIONS DO CONCELLO DE PORTO DO SON PARA O PERÍODO 2018-2020.**

O Sr. secretario dá lectura á proposta da Alcaldía, que é do seguinte teor literal:

### **"PROPOSTA AO PLENO DA CORPORACIÓN**

#### **ASUNTO: APROBACIÓN DO PLAN ESTRATÉXICO DE SUBVENCIONS 2018-2020**

José Luis Oujo Pouso, Alcalde- Presidente do Concello de Porto do Son,

En cumprimento do disposto no artigo 8.1 da Lei 38/2003 de 17 de novembro; Xeral de Subvencións, que en aras de mellorar a eficacia do outorgamento de subvencións, establece a necesidade de elaborar un Plan Estratéxico de Subvencións, que estableza unha conexión entre os obxectivos e efectos que se pretenden obter, cos custos previsibles e as súas fontes de financiamento, e co obxectivo de adecuar as necesidades públicas a cubrir a través de subvencións, coas previsións de recursos dispoñibles, con carácter previo ao seu nacemento.

Pola presente,

**Primeiro.-** A aprobación do Plan Estratéxico de Subvencións do Concello de Porto do Son para o período 2018-2020.

**Segundo.-** Dar conta do presente acordo á Intervención e Tesourería municipais.

Porto do Son, a 3 de xullo de 2018.

O Alcalde,  
Asdo. José Luis Oujo Pouso."

D<sup>a</sup>. Josefa M<sup>a</sup> Hermo García menciona que, tal como indicou na comisión informativa a Sra. interventora, o presente é un documento de existencia obrigatoria.

En relación ao contido do Plan Estratéxico de Subvencións, di que bota en falta que se detalle cales son as competencias afectadas en cada área e cales van ser as medidas para facelas efectivas.

Finalmente, dirixíndose á Sra. Maneiro Quintáns, apunta que non é que non se aleden polo traballo realizado polo goberno municipal pero o certo é que son 7 concelleiros a cobrar e algún traballo terán que facer.

D<sup>a</sup>. M<sup>a</sup> Asunción Torres Parada detalla que o Plan Estratéxico de Subvencións vén esixido pola Lei xeral de subvencións e que é obrigatorio desde o ano 2003, o que significa que o goberno municipal leva 7 anos outorgando subvencións sen cumprir con todos os trámites legais e con

informes dos técnicos advertindo desas irregularidades. Engade que o goberno municipal tivo tempo abondo para traer ao Pleno este documento.

Finaliza a súa intervención a voceira de Portodos indicando que consideran que o Plan Estratéxico de Subvencións debería ter unha duración e vixencia maiores.

D<sup>a</sup>. María Ánxela Franco Pouso sinala que no informe de Intervención se indica que “o plan proposto se adecúa ao contido mínimo legal”, é dicir, recolle o mínimo legal esixible. Continúa afirmando que o Plan Estratéxico de Subvencións é un “refrito” das subvencións incluídas nos Orzamentos do concello, que se trata dun documento “minimísimo” e que, máis ben, é unha listaxe de persoas ás que se lle queren dar subvencións, con algunhas das cales concordan, por outra banda.

A voceira do BNG considera que o Plan Estratéxico de Subvencións, mais que de igualdade, debe tratar de equidade, valorando todo o que os beneficiarios das subvencións van facer, pois semella que tanto os clubs deportivos como as comisións de festas fan o mesmo traballo. Tamén opina que o normal sería que o documento explicase por que se lle outorga unha subvención maior a algunhas comisións de festas. Prosegue detallando que bota en falta subvencións para investimentos e que se deberían matizar algúns aspectos, como o feito de que os clubs beneficiarios de subvencións están a usar instalacións de titularidade municipal. Tamén, di, bota de menos no documento subvencións para as comunidades de montes en man común ou para sectores que crean emprego e que semella que se está a actuar como se facía antes.

Conclúe a súa intervención afirmando que o que se pretende aprobar non é un Plan Estratéxico de Subvencións, senón unha listaxe de a quen quere axudar o grupo de goberno e que é un documento feito á medida dese goberno municipal.

D<sup>a</sup>. María José Maneiro Quintáns di que non sabe a quen lle queren dar leccións as voceiras dos grupos da oposición e que clama ao ceo que a Sra. Torres Parada afirme que levan 7 anos sen elaborar o Plan Estratéxico de Subvencións cando, precisamente, o que se está a facer é tentar regularizar a situación das subvencións municipais; ao respecto, explica que anteriormente se outorgaban subvencións “en especie” que sempre levaban informes en contra.

Continúa explicando que desde o goberno municipal incluíron as subvencións nos Orzamentos do concello, asinaron convenios para as subvencións nominativas, deron de alta ao concello na Base Nacional de Subvencións e agora queren aprobar un Plan Estratéxico de Subvencións.

Remata a súa intervención indicando que este ano se destinan 100.000 euros a subvencións e, dirixíndose á voceira do BNG, afirma que non son excluíntes.

D<sup>a</sup>. Josefa M<sup>a</sup> Hermo García sinala que bota en falta no documento un plan de acción para as áreas afectadas polas subvencións e un maior detalle con respecto a esas áreas.

D<sup>a</sup>. M<sup>a</sup> Asunción Torres Parada apunta que non é ela quen di que o goberno municipal está a incumprir a Lei xeral de subvencións senón reiterados informes de Intervención.

D<sup>a</sup>. María Ánxela Franco Pouso sinala que non entende por que fachendea a Sra. Maneiro Quintáns, pois levan 7 anos gobernando e, en relación ao asunto que se debate, apunta que o Plan Estratéxico de Subvencións máis ben lle parece que está destinado a sacarse de enriba un trámite.



Aludindo á súa anterior intervención, puntualiza que falou de equidade no outorgamento das subvencións, non das axudas ás comisións de festas.

Doutro lado, sinala que a Sra. Maneiro Quintáns mencionou as subvencións “en especie” pero neste momento hai entidades que están a usar locais municipais.

A Sra. Franco Pouso afirma que se o Plan Estratégico de Subvencións vai servir para reducir os trámites, será benvido pero non poden esquecer que neste momento hai subvencións encubertas posto que algunhas entidades están a usar locais municipais e lle cargan os gastos de auga e lixo ao concello e, mentres, á Asociación de Veciños de Xuño “cargóuselle o carro”.

D<sup>a</sup>. María José Maneiro Quintáns non fai uso da súa quenda de palabra.

Non habendo mais intervencións, o Sr. Alcalde- Presidente dá paso á votación da proposta.

En consecuencia, o Pleno Corporativo, trala **votación ordinaria e por sete (7) votos a favor (7 PP) e con seis (6) abstencións (2 PSdG- PSOE+ 2 Portodos+ 2 BNG)**, polo tanto co **quorum da maioría absoluta**, sendo **trece (13)** o número legal de membros da Corporación, **APROBA a proposta** nos seus propios termos.

## **8. APROBACIÓN INICIAL DA MODIFICACIÓN DA BASE 39<sup>a</sup> DAS BASES DE EXECUCIÓN DOS ORZAMENTOS XERAIS PARA 2018.**

O Sr. secretario dá lectura á proposta da Alcaldía, que é do seguinte teor literal:

### **“PROPOSTA AO PLENO DA CORPORACIÓN**

**ASUNTO: Modificación da base número 39 relativa ao Control Interno**

José Luis Oujo Pouso, Alcalde- Presidente do Concello de Porto do Son,

Visto o informe da Intervención do 3 de xullo de 2018 polo que se propón a modificación da base 39 do orzamento 2018:

#### **“ANTECEDENTES**

*O 1 de xullo entrou en vigor Real Decreto 424/2017, de 28 de abril, polo que regula o réxime xurídico do control interno nas entidades do Sector Público Local, no cal se establecen entre outros aspectos que o control interno da entidade local obrigatoriamente debe asegurar un modelo de control efectivo, tal coma se indica no seu preámbulo: “establecéndose uns umbrales mínimos e sobre a base dunha análise de riscos consistente cos obxectivos que se pretendan conseguir e as prioridades de cada exercicio. Este modelo se asegurará con medios propios ou externos, o control efectivo do 100% do orzamento xeral consolidado do exercicio na modalidade de función interventora, e alomenso o 80% mediante a modalidade do control financeiro. Para este último, no transcurso de tres exercicios*

consecutivos e con base nunha análise previo de riscos, deberá alcanzar o 100% do orzamento xeral consolidado”.

A tal efecto, o desenvolvemento da función interventora, que comprende todas e cada unha das fases orzamentarias e previa á adopción de calquera acordo que teña repercusión económica, poderá realizarse mediante a fiscalización e intervención previa ordinaria, como ata agora viña de facto desenvolvéndose no Concello de Porto Son, ou mediante un réxime de fiscalización limitada previa. Dentro de esta última o Plen está facultado, para determinar o réxime de requisitos básicos, de alomenos deberá recoller os extremos fixados polo Acordo do Consejo de Ministros previsto no artigo 152.1 da Lei 47/2003, de 26 de novembro, Xeral Orzamentaria, con respecto o exercicio da función interventora no réximen de requisitos básicos. O último acordo adoptado é do de 30.05.2008 actualizado o 1.07.2011, publicado no BOE.

Tendo en conta que a propia base que se modifica xa prevé a modificación da mesma para adecuala ó RD 424/2007 de 28 de abril, e por outro lado, considerando a insuficiencia de medios crónica do órgano de intervención, se considera oportuno escoller o modelo de fiscalización previa limitada aos requisitos esenciais do Acordo de Consello de Ministros nos aspectos que sexan de aplicación ás entidades locais, modificando o contido da base 39 do orzamento de 2018 que pasa a ser o seguinte:

### **“CONTROL INTERNO E FUNCIÓN INTERVENTORA.**

#### **1. A función interventora.**

Exerceranse directamente pola Intervención, as funcións de Control Interno, na súa tripla acepción de función interventora, función de control financeiro e función de control de eficacia.

Ao abeiro do disposto no artigo 214 do TRLRHL, a función interventora terá por obxecto fiscalizar todos os actos da Entidade que dean lugar ao recoñecemento e liquidación de dereitos e obrigas ou gastos de contido económico, os ingresos e pagamentos que daqueles se deriven, e a recadación, investimento e aplicación, en xeral, dos caudais públicos administrados, co fin de que a xestión se axuste ás disposicións aplicables en cada caso.

A Intervención Municipal recibirá o expediente orixinal completo, unha vez reunidos todos os xustificantes e emitidos todos os informes preceptivos e con carácter previo á adopción do acordo ou resolución correspondente.

A Intervención fiscalizará o expediente no prazo máximo de dez días hábiles a contar dende o día seguinte á data de recepción, prazo que se reducirá a cinco días cando se declare a urxencia na tramitación do expediente.

Cando a Intervención o estime necesario, poderá solicitar cantos antecedentes e documentos, así como informes técnicos e de asesoramento precisos, para o exercicio das súas funcións, de acordo co artigo 222 do TRLRHL.

O exercicio da expresada función comprende:

- a) A intervención crítica ou previa de todo acto, documento ou expediente susceptible de producir dereitos ou obrigas de contido económico ou movemento de fondos de valores.
- b) A intervención formal da ordenación do pagamento.
- c) A intervención material do pagamento.
- d) A intervención e comprobación material dos investimentos e da aplicación das subvencións.

#### **2. Omisión da función fiscalizadora.**



1. Nos supostos nos ca función interventora fose preceptiva e houbésese omitido, non se poderá recoñecer a obrigación, nin tramitar o pago, nin intervir favorablemente estas actuacións ata que se coñeza e resolva dita omisión nos termos seguintes.

2. Se o órgano interventor ao coñecer dun expediente observase omisión da función interventora manifestarao á autoridade que iniciase aquel e emitirá ao mesmo tempo a súa opinión respecto da proposta, a fin de que, unindo este informe ás actuacións, poida o Presidente da Entidade Local decidir se continua o procedemento ou non e demais actuacións que no seu caso, procedan.

Nos casos de que a omisión da fiscalización previa refírase ás obrigacións ou gastos cuxa competencia sexa de Pleno, o Presidente da Entidade Local deberá someter a decisión do Pleno se continua o procedemento e as demais actuacións que, no seu caso, procedan.

Este informe, que non terá natureza de fiscalización, incluírase na relación de informes ca Intervención ten que facer coa dación da liquidación e a conta xeral, e poñerá de manifesto, como mínimo, os seguintes extremos:

- a) Descrición detallada do gasto, con inclusión de todos os datos necesarios para a súa identificación, facendo constar, polo menos, o órgano xestor, o obxecto do gasto, o importe, a natureza xurídica, a data de realización, o concepto orzamentario e exercicio económico ao que se imputa.
- b) Exposición dos incumprimentos normativos que, a xuízo do interventor informante, producíronse no momento en que se adoptou o acto con omisión da preceptiva fiscalización ou intervención previa, enunciando expresamente os preceptos legais infrinxidos.
- c) Constatación de que as prestacións se han levado a cabo efectivamente e de que o seu prezo axústase ao prezo de mercado, para o que se terán en conta as valoracións e xustificantes achegados polo órgano xestor, que haberá de solicitar os asesoramentos ou informes técnicos que resulten precisos a tal fin.
- d) Comprobación de que existe crédito orzamentario adecuado e suficiente para satisfacer o importe do gasto.
- e) Posibilidade e conveniencia de revisión dos actos ditados con infracción do ordenamento, que será apreciada polo interventor en función de se se realizaron ou non as prestacións, o carácter destas e a súa valoración, así como dos incumprimentos legais que se produciron.

Para iso, terase en conta que o resultado da revisión do acto materializarase acudindo á vía de indemnización de danos e prexuízos derivada da responsabilidade patrimonial da Administración como consecuencia de producirse un enriquecemento inxusto no seu favor ou de incumprir a obrigación ao seu cargo, polo que, por razóns de economía procesual, só sería pertinente instar dita revisión cando sexa presumible que o importe das devanditas indemnizacións fose inferior ao que se propón.

3. O acordo favorable do Presidente, do Pleno ou da Xunta de Goberno Local non eximirá da esixencia das responsabilidades a que, no seu caso, houbese lugar.

#### 4. **Dos reparos.**

Regulado nos artigos 215 a 218 do TRLRHL.

Se no exercicio da función interventora o órgano interventor se manifestase en desacordo co fondo ou coa forma dos actos, documentos ou expedientes examinados, deberá formular os seus reparos por escrito antes da adopción do acordo ou resolución.

*Cando a desconformidade se refira ao recoñecemento ou liquidación de dereitos a favor das entidades locais ou os seus organismos autónomos, a oposición formalizarase en nota de reparo que, en ningún caso, suspenderá a tramitación do expediente.*

*Se o reparo afecta á disposición de gastos, recoñecemento de obrigas ou ordenación de pagamentos, suspenderase a tramitación do expediente ata que aquel sexa solucionado nos seguintes casos:*

- a. Cando se basee na insuficiencia de crédito ou o proposto non sexa adecuado.*
- b. Cando non fosen fiscalizados os actos que deron orixe ás ordes de pagamento.*
- c. Nos casos de omisión no expediente de requisitos ou trámites esenciais:*
  - 1. Cando o gasto propóñase a un órgano que careza de competencia para a súa aprobación.*
  - 2. Cando se aprecien graves irregularidades na documentación xustificativa do recoñecemento da obrigación ou non se acredite suficientemente o dereito do seu perceptor.*
  - 3. Cando se haxan omitido requisitos ou trámites que puidesen dar lugar á nulidade do acto, ou cando a continuación da xestión administrativa puidese causar quebrantos económicos á Tesourería da Entidade Local ou a un terceiro.*
- d. Cando o reparo derive de comprobacións materiais de obras, subministracións, adquisicións e servizos.*

*Cando o órgano a que afecte o reparo non estea de acordo con este, corresponderá ao presidente da entidade local resolver a discrepancia, sendo a súa resolución executiva. Esta facultade non será delegable en ningún caso.*

*Non obstante o disposto no apartado anterior, corresponderá ao Pleno a resolución das discrepancias cando os reparos:*

- a. Baséense en insuficiencia ou inadecuación de crédito.*
- b. Refíranse a obrigas ou gastos cuxa aprobación sexa da súa competencia.*

*O órgano interventor elevará informe ao Pleno de todas as resolucións adoptadas polo Presidente da Entidade Local contrarias aos reparos efectuados, así como un resumo das principais anomalías detectadas en materia de ingresos. O devandito informe atenderá unicamente a aspectos e labores propios do exercicio da función fiscalizadora, sen incluír cuestións de oportunidade ou conveniencia das actuacións que fiscalice.*

*O contido neste apartado constituirá un punto independente na orde do día da correspondente sesión plenaria.*

*O Presidente da Corporación poderá presentar no Pleno informe xustificativo da súa actuación. Sen prexuízo do anterior, cando existan discrepancias, o Presidente da Entidade Local poderá elevar a súa resolución ao órgano de control competente por razón da materia da Administración que teña atribuída a tutela financeira.*

*O órgano interventor remitirá anualmente ao Tribunal de Contas todas as resolucións e acordos adoptados polo Presidente da Entidade Local e polo Pleno da Corporación contrarios aos reparos formulados, así como un resumo das principais anomalías detectadas en materia de ingresos. Á citada documentación deberá acompañar, se é o caso, os informes xustificativos presentados pola Corporación local.*

*Todo o anterior sen prexuízo do sinalado no artigo 219 do TRLRHL.*



## 5. **Non suxección a intervención previa.**

*Non estarán sometidos a intervención previa os gastos de material non inventariable nin contratos menores. Tampouco estarán suxeitos os gastos de carácter periódico e demais de tracto sucesivo, unha vez intervindo o gasto correspondente ao período inicial do acto ou contrato do que deriven ou as súas modificacións, así como outros gastos menores de 3.005,06 euros que, de acordo coa normativa vixente, se fagan efectivos a través do sistema de anticipos de caixa fixa.*

## 6. **Fiscalización de gastos.**

*Os tipos de gastos sometidos ao réxime de fiscalización previa limitada serán os seguintes:*

- a) *Gastos de persoal.*
- b) *Contratos de obras.*
- c) *Contratos de subministracións.*
- d) *Contratos de servizos.*
- e) *Contratos mixtos.*
- f) *Contratos que teñan por obxecto a creación artística e literaria.*
- g) *Expedientes de subvencións e axudas públicas aos que resulte de aplicación a Lei 38/2003, do 17 de novembro, Xeneral de Subvencións.*
- h) *Restantes expedientes nos que sexan aplicables os requisitos esenciais contidos no Acordo do Consello de Ministros.*

*A fiscalización e intervención previa de gastos ou obrigacións realizarase mediante a comprobación dos seguintes extremos con carácter xeral:*

- a) *A existencia de crédito orzamentario e que o proposto é o adecuado á natureza do gasto ou obrigación que se propoña contraer.*

*Nos casos nos que o crédito orzamentario dea cobertura a gastos con financiamento afectado comprobarase que os recursos que os financian son executivos, acreditándose coa existencia de documentos fidedignos que acrediten a súa efectividade.*

*Cando se trate de contraer compromisos de gastos de carácter plurianual comprobarase, ademais, se se cumpre o preceptuado no artigo 174 do texto refundido da Lei reguladora das Facendas Locais.*

*Entenderase que o crédito é adecuado cando financie obrigacións a contraer ou nadas e non prescritas a cargo á tesourería da Entidade Local que cumpran os requisitos dos artigos 172 e 176 do texto refundido da Lei reguladora das Facendas Locais.*

- b) *Que as obrigacións ou gastos xéranse por órgano competente.*

*En todo caso comprobarase a competencia do órgano de contratación ou concedente da subvención cando devandito órgano non teña atribuída a facultade para a aprobación dos gastos de que se trate.*

*A fiscalización e intervención previa de gastos ou obrigacións realizarase mediante a comprobación dos seguintes extremos con carácter específico:*

### A. **Gastos de persoal.**

- 1. *Convocatoria de probas selectivas.*

- a) *A incorporación de certificado acreditativo, expedido por órgano competente, de que os postos para cubrir figuran detallados nas respectivas relacións de postos de traballo e están vacantes.*

*No caso de contratación de personal laboral temporal, que figure no Anexo de persoal.*

2. *Selección y nombramiento del personal funcionario.*

- a) *Requisito de publicidade da correspondente convocatoria.*  
b) *Acta do tribunal seleccionador e proposta de nombramento.*

3. *Contratación do persoal laboral fixo.*

- a) *Requisito de publicidade da correspondente convocatoria.*  
b) *Acta do tribunal seleccionador e proposta de nomeamento.*  
c) *Adecuación do contrato que se formaliza co disposto na normativa vixente.*  
d) *Que as retribucións que se sinalen no contrato axústense ao Convenio Colectivo que resulte de aplicación.*

4. *Contratación de persoal laboral temporal.*

- a) *Acta do tribunal seleccionador e proposta de nomeamento.*  
b) *Adecuación do contrato que se formaliza co disposto na normativa vixente.*  
c) *Que as retribucións que se sinalen no contrato axústense ao Convenio Colectivo que resulte de aplicación.*

5. *Prórroga de contratos temporais.*

- a) *Verificarase que non supera o prazo previsto na lexislación vixente.*

6. *Contratación de persoal temporal para a realización de investimentos.*

- a) *Verificarase a existencia do informe Xurídico, sobre a modalidade de contratación temporal utilizada e sobre a observancia, nas cláusulas do contrato, dos requisitos e formalidades esixidos pola lexislación laboral, e Informe do técnico oportuno sobre a realización dos investimentos con recursos propios.*

7. *Nóminas de retribucións de persoal.*

- *Que as nóminas están asinadas polo responsable do Servizo ou o Alcalde da Corporación.*
- *No caso das de carácter ordinario, comprobación aritmética que se realizará efectuando o cadre total da nómina, co que resulte do mes anterior máis a suma algebraica das variacións incluídas na nómina do mes de que se trate.*
- *Xustificación documental das variacións experimentadas por altas e baixas, limitada aos seguintes extremos:*
  - *Altos cargos: Copia do acordo de nomeamento ou documento no que se indique a data da súa publicación oficial, dilixencia da correspondente toma de posesión e verificación das retribucións.*
  - *Persoal de novo ingreso: Acordo de nomeamento, dilixencia da correspondente toma de posesión e verificación de que as retribucións están de acordo co grupo e posto de traballo.*
  - *Persoal laboral de novo ingreso: copia do expediente de contratación sobre o que foi exercida a fiscalización do gasto, e do contrato formalizado en todo caso.*
  - *Persoal laboral temporal: copia dos contratos do devandito persoal.*



- *Nos expedientes de aprobación e recoñecemento da cota patronal á Seguridade Social comprobaranse os extremos de carácter xeral.*
- *En caso de produtividade e gratificacións:*
  - *Acordo plenario regulador do mesmo*
  - *Xustificación documental*
  - *Acordo de aprobación polo órgano competente.*

**B. Contratos de obras.** *O sinalado na Resolución do 2 de xuño de 2008, da Intervención Xeral da Administración do Estado, pola que se publica o Acordo do Consello de Ministros do 30 de maio de 2008, polo que se dá aplicación á previsión dos artigos 152 e 147 da Lei Xeral Orzamentaria, respecto ao exercicio da función interventora en réxime de requisitos básicos, ou norma ca modifique.*

**C. Contratos de subministracións.** *O sinalado na Resolución do 2 de xuño de 2008, da Intervención Xeral da Administración do Estado, pola que se publica o Acordo do Consello de Ministros do 30 de maio de 2008, polo que se dá aplicación á previsión dos artigos 152 e 147 da Lei Xeral Orzamentaria, respecto ao exercicio da función interventora en réxime de requisitos básicos, ou norma ca modifique.*

**D. Contratos de servizos.** *O sinalado na Resolución do 2 de xuño de 2008, da Intervención Xeral da Administración do Estado, pola que se publica o Acordo do Consello de Ministros do 30 de maio de 2008, polo que se dá aplicación á previsión dos artigos 152 e 147 da Lei Xeral Orzamentaria, respecto ao exercicio da función interventora en réxime de requisitos básicos, ou norma ca modifique.*

**E. Contratos mixtos.** *Fiscalizárase o sinalado para o contrato polo cal de adxudique.*

**F. Contratos que teñan por obxecto a creación artística e literaria.** *O sinalado na Resolución do 2 de xuño de 2008, da Intervención Xeral da Administración do Estado, pola que se publica o Acordo do Consello de Ministros do 30 de maio de 2008, polo que se dá aplicación á previsión dos artigos 152 e 147 da Lei Xeral Orzamentaria, respecto ao exercicio da función interventora en réxime de requisitos básicos, ou norma ca modifique.*

**G. Expedientes de subvencións e axudas públicas aos que resulte de aplicación a Lei 38/2003, do 17 de novembro, Xeneral de Subvencións.** *O sinalado na Resolución do 2 de xuño de 2008, da Intervención Xeral da Administración do Estado, pola que se publica o Acordo do Consello de Ministros do 30 de maio de 2008, polo que se dá aplicación á previsión dos artigos 152 e 147 da Lei Xeral Orzamentaria, respecto ao exercicio da función interventora en réxime de requisitos básicos, ou norma ca modifique.*

## **7. Intervención da comprobación material do investimento.**

*Antes de liquidar o gasto ou recoñecer a obrigaón verificarase materialmente a efectiva realización das obras, servizos ou adquisicións financiadas con fondos públicos e a súa adecuación ao contido do correspondente contrato.*

*A intervención da comprobación material realizarase polo órgano interventor. O órgano interventor poderá estar asesorado cando sexa necesaria a posesión de coñecementos técnicos para realizar a comprobación material.*

*Nos mesmos termos que sinala a Resolución do 14 de xullo de 2015, da Intervención Xeral da Administración do Estado, sobre o desenvolvemento da función interventora no ámbito da*

comprobación material do investimento, cando a Intervención ou en quen se delegue, vaia acompañada da designación dun asesor, o criterio da Intervención sobre a adecuación dos aspectos técnicos do investimento ás prescricións do contrato ou encargo, basearase na opinión do asesor técnico sobre os devanditos aspectos.

A Intervención e, no seu caso, asesor designados quedarán exentos de calquera responsabilidade cando os posibles defectos ou faltas de adecuación do investimento realizado coas condicións xerais ou particulares da execución da mesma deriven de aspectos ou condicións de execución que non dean lugar a resultado tanxible, susceptible de comprobación, ou de vicios ou elementos ocultos, imposibles de detectar no momento de efectuar a comprobación material do investimento.

Tampouco haberá lugar á esixencia de responsabilidade en relación a aquelas deficiencias ou incorreccións respecto das cales o esforzo que houbese de esixirse a Intervención e, no seu caso, ao asesor para detectalas fose desproporcionado cos medios persoais e materiais dispoñibles para efectuar o acto de comprobación.

Nos supostos nos que non se designou asesor técnico, a responsabilidade esixible a Intervención quedará limitada aos aspectos e deficiencias que se poidan detectar atendendo á dilixencia media esixida aos profesionais da Administración que non requiren cualificación técnica nun sector específico obxecto do investimento para o desempeño das funcións asignadas ao seu posto de traballo.

Os órganos xestores deberán solicitar ao órgano interventor, ou en quen delegue, a súa asistencia á comprobación material do investimento cando o importe desta sexa igual ou superior a 50.000,00 euros, con exclusión do Imposto sobre o Valor Engadido, cunha antelación de vinte días á data prevista para a recepción do investimento de que se trate.

A intervención da comprobación material do investimento realizarase, en todo caso, concorrendo o órgano interventor, ou en quen delegue, ao acto de recepción da obra, servizo ou adquisición de que se trate.

Cando se aprecien circunstancias que o aconsellen, o órgano interventor poderá acordar a realización de comprobacións materiais do investimento durante a execución das obras, a prestación de servizos e fabricación de bens adquiridos mediante contratos de subministracións.

O resultado da comprobación material do investimento reflectirase en acta que será subscrita por todos os que concorran ao acto de recepción da obra, servizo, ou adquisición e na que se farán constar, no seu caso, as deficiencias apreciadas, as medidas para adoptar para emendalas e os feitos e circunstancias relevantes do acto de recepción. Na devandita acta ou en informe ampliatorio poderán os concurrentes, de forma individual ou colectiva, expresar as opinións que estimen pertinentes.

#### **Actas de recepción e resultado da intervención da comprobación material.**

O resultado da intervención da comprobación material do investimento reflectirase no mesmo acta no que se formalice o acto de recepción previsto na lexislación de contratos, que será subscrita por todos os que concorran ao acto de recepción, facendo constar, no seu caso, as deficiencias apreciadas, as medidas para adoptar para emendalas e os feitos e circunstancias relevantes do acto de comprobación.

O pronunciamiento da Intervención, isto é, o resultado da intervención da comprobación material do investimento, corresponderase con algún dos que se indican a continuación: «favorable», «favorable con observacións» ou «desfavorable». Debendo acompañarse no caso de “favorable con observacións” ou “desfavorable” dun informe independente da acta.



**Acta «Favorable»**, cando as obras, subministracións ou servizos atópanse en bo estado e con arranxo ás prescricións técnicas previstas no contrato ou encargo, así como, no seu caso, nas melloras ofertadas polo adxudicatario do contrato que fosen aceptadas polo órgano de contratación ou nas modificacións debidamente aprobadas. No acta haberá de facer constar de forma expresa que a opinión que se emite é de carácter favorable.

**Acta «Favorable con observacións»**, cando as obras, subministracións ou servizos atópanse en bo estado e con arranxo ás prescricións técnicas previstas no contrato ou encargo e, no seu caso, nas melloras ofertadas e aceptadas e nas modificacións debidamente aprobadas, non precisando, en consecuencia, un novo acto de recepción.

As observacións para formular deben vir motivadas por os supostos sinalados na Resolución do 14 de xullo de 2015, da Intervención Xeral da Administración do Estado, sobre o desenvolvemento da función interventora no ámbito da comprobación material do investimento.

**Acta «Desfavorable»**, cando as obras, subministracións ou servizos non se atopen en bo estado ou non se axusten ás condicións xerais ou particulares previstas no contrato ou encargo, así como, no seu caso, nas melloras ofertadas polo adxudicatario do contrato que fosen aceptadas polo órgano de contratación ou nas modificacións debidamente aprobadas. Nestes casos, a opinión desfavorable deberá estar motivada en informe ampliatorio.

Son supostos que levan unha opinión desfavorable os sinalados na Resolución do 14 de xullo de 2015, da Intervención Xeral da Administración do Estado, sobre o desenvolvemento da función interventora no ámbito da comprobación material do investimento.

#### **Actas de comprobacións materiais durante o investimento.**

Nos supostos nos que acordouse a realización de comprobacións materiais do investimento durante a execución das obras, subministracións ou servizos, o resultado destas actuacións recollerase nun acta, na que se farán constar, no seu caso, as deficiencias observadas, as medidas para adoptar para emendalas e os feitos e circunstancias relevantes do devandito acto.

Este acto considérase como unha actuación de control independente e distinto da recepción prevista na lexislación de contratos, á que en ningún caso substituirá.

Nos casos en que a intervención da comprobación material do investimento non sexa preceptiva, a comprobación do investimento xustificarse co acta de conformidade asinada por quen participou na mesma ou cunha certificación expedida polo Xefe do centro, dependencia ou organismo a quen corresponda recibir ou aceptar as obras, servizos ou adquisicións, na que se expresará haberse feito cargo do material adquirido, especificándoo co detalle necesario para a súa identificación, ou executarse a obra ou servizo con arranxo ás condicións xerais e particulares que, en relación con eles, fosen previamente establecidas.

#### **8. Fiscalización de ingresos.**

Aos efectos de axilizar a tramitación dos ingresos no Concello, substitúese a fiscalización previa de dereitos dos capítulos 1,2 e 3 de ingresos pola inherente á toma de razón en Contabilidade e por comprobacións posteriores mediante técnicas de mostraxe ou auditoría de ditos capítulos. No caso de que sexan ingresos que se vaian a liquidar por primeira vez por ser de nova creación, a fiscalización será plena.

#### **9. Control financeiro e Plan Anual Financeiro para o exercicio 2018.**

No control financeiro para o exercicio 2018 (a realizar durante os sete primeiros meses do exercicio

2019), se realizarán as seguintes actuacións, na medida do posible cos medios existentes:

1. *Control financeiro a posteriori en:*

- *Contratos de obras.*
- *E selección de persoal.*

*Procederá a analizarse mediante control a posteriori, mediante técnicas de mostraxe ou auditoría de ditos gastos (en función do tipo de gasto), debéndose coller unha mostra representativa, que afecte a lo menos, ao 5% dos expedientes tramitados, procedéndose a realizar un informe sobre as incidencias detectadas.*

*Para recoller esa mostra representativa utilizaráse os programas o medios que determine a Intervención, e en presenza da Secretaria levantarase acta dos expedientes escollidos por un funcionario de Intervención ao azar, que serán os de obxeto de estudio.*

2. *Control financeiro permanente.*

*Procederá a analizarse mediante procedementos de auditoría, a través de técnicas de mostraxe según o tipo de ingreso (en su caso), debéndose coller unha mostra representativa, que afecte a lo menos, ao 5% dos expedientes tramitados, procedéndose a realizar un informe sobre as incidencias detectadas.*

*Para recoller esa mostra representativa utilizaráse a Contabilidade municipal recollida nos capítulos 1 a 3 de ingresos, e en presenza da Secretaria levantarase acta dos expedientes escollidos por un funcionario de Intervención ao azar, que serán os de obxeto de estudio.*

*O devandito Informe, xunto coas observacións que formulen os órganos xestores, remitirase ao Pleno da Corporación, xunto coa aprobación da Conta Xeral.”*

Pola presente,

**PROPOÑO AO PLENO DA CORPORACIÓN**

**Primeiro.-** Modificar a base 39ª do orzamento 2018, coa redacción indicada anteriormente.

**Segundo.-** Dar conta do presente acordo á Intervención e demais departamentos municipais.

Porto do Son, a 3 de xullo de 2018

O Alcalde,  
Asdo. José Luis Oujo Pouso.”

Dª. Josefa Mª Hermo García non fai uso da súa quenda de intervención.

Dª. Mª Asunción Torres Parada detalla que o 1 de xullo entrou en vigor o Real Decreto de 2017 que regula o exercicio do control interno no Sector Público Local, e que ten por obxecto regular o xeito no que se debe realizar a fiscalización. Con esa norma deberase comprobar, antes da adopción dun acordo de contido económico, que este se axusta á legalidade e aos principios de boa xestión económica, financeira e patrimonial, verificando o cumprimento duns requisitos esenciais, que foron fixados por acordo do Consello de Ministros a proposta da Intervención Xeral do Estado; a falla de cumprimento deses requisitos dará lugar a un informe desfavorable. Ese Real Decreto, continúa, tamén obriga a verificar o 100 % dos expedientes en 2 ou 3 anos.



Neste caso, di a Sra. Torres Parada, a Intervención municipal propón facer unha selección obxectiva dos expedientes que se van suxeitar a ese control interno, polo que expresa o seu acordo con que o concello se adhira a esa esixencia legal.

D<sup>a</sup>. M<sup>a</sup> Ánxela Franco Pouso afirma que as leis hai que cumprilas, e engade que bota en falta que quen fan as leis non poñan os medios suficientes para cumprilas. Tamén considera que se debería dotar de máis persoal a Intervención para velar polo cumprimento da lei.

D<sup>a</sup>. María Maneiro Quintáns non fai uso da súa quenda de palabra.

Non habendo mais intervencións, o Sr. Alcalde- Presidente dá paso á votación da proposta.

En consecuencia, o Pleno Corporativo, trala **votación ordinaria e por sete (7) votos a favor (7 PP) e con seis (6) abstencións (2 PSdG- PSOE+ 2 Portodos+ 2 BNG)**, polo tanto co **quorum da maioría absoluta**, sendo **trece (13)** o número legal de membros da Corporación, **APROBA a proposta** nos seus propios termos.

## **9. APROBACIÓN INICIAL DA MODIFICACIÓN DA BASE 46<sup>a</sup> DAS BASES DE EXECUCIÓN DOS ORZAMENTOS XERAIS PARA 2018.**

O Sr. secretario dá lectura á proposta da Alcaldía, que é do seguinte teor literal:

### **“PROPOSTA AO PLENO DA CORPORACIÓN**

**ASUNTO: Modificación da base número 46 relativa a subvencións nominativas e directas**

José Luis Oujo Pouso, Alcalde- Presidente do Concello de Porto do Son,

A base número 46<sup>a</sup> do orzamento 2018 contempla varias subvencións nominativas a favor de diferentes asociacións ou entidades sen ánimo de lucro, entre outras, a agrupación que se indica a continuación,

- *135.48001 Agrupación de voluntarios de Protección Civil do Concello de Porto do Son (G15561020). Gastos correntes de funcionamento. Importe: 2.000,00€ Coeficiente de financiación:1*

Visto que por decreto de alcaldía número 330 de 08.05.2018 e número 386 de 28.05.2018, procedeuse á contratación como laboral temporal de dous coordinadores de Protección Civil mediante a celebración do correspondente proceso selectivo,

Polo disposto, considerase necesario deixar sen efecto a subvención nominativa indicada e destinar o importe asignado á mesma, a sufragar os gastos correntes necesarios que resulten no servizo de Protección Civil.

Pola presente,

## PROPOÑO AO PLENO DA CORPORACIÓN

**Primeiro.-** Modificar a base 46ª do orzamento 2018, no sentido de deixar sen efecto a subvención nominativa a favor da *Agrupación de voluntarios de Protección Civil do Concello de Porto do Son (G15561020)*, por importe de 2.000,00 €.

**Segundo.-** Mar conta do presente acordo á Intervención e Tesourería municipais.

Porto do Son, a 28 de xuño de 2018

O Alcalde,  
Asdo. José Luis Oujo Pouso.”

Dª. Josefa Mª Hermo García recorda que fai case un ano se levou a cabo unha campaña de captación de voluntarios para Protección Civil, acadando uns 16 voluntarios dos cales colaboran coa agrupación uns 5 ou 6; doutro lado, indica que só hai 2 coordinadores de Protección Civil, que son os postos que están retribuídos.

A voceira socialista pregunta cantos voluntarios de protección civil se captaron e canto se gastou na agrupación.

Dª. Mª Asunción Torres Parada non fai uso da súa quenda de palabra.

Dª. Mª Ánxela Franco Pouso di que, se neste momento, hai 2 postos de traballo en Protección Civil é lóxico que sobren 2.000 euros. Doutro lado, pide que os voluntarios da agrupación estean cubertos por un seguro e tamén agarda que os equipos para Protección Civil contén cos equipos e ferramentas necesarias para desenvolver as súas funcións.

Non habendo mais intervencións, o Sr. Alcalde- Presidente dá paso á votación da proposta.

En consecuencia, o Pleno Corporativo, trala **votación ordinaria e por nove (9) votos a favor (7 PP+ 2 BNG) e con catro (4) abstencións (2 PSdG- PSOE+ 2 Portodos)**, polo tanto co **quorum da maioría absoluta**, sendo **trece (13)** o número legal de membros da Corporación, **APROBA a proposta** nos seus propios termos.

## **10. APROBACIÓN DE MODIFICACIÓNS ORZAMENTARIAS: TRANSFERENCIA DE CRÉDITO 7/2018.**

O Sr. secretario dá lectura á proposta da Alcaldía, que é do seguinte teor literal:

### “PROPOSTA AO PLENO DA CORPORACIÓN

D. JOSÉ LUIS OUJO POUZO, Alcalde- Presidente do Concello de Porto do Son, en uso das facultades que lle confire o artigo 21.1 q) da Lei 7/1985, de 2 de abril, reguladora das bases do réxime local, e da base 19ª do orzamento do 2018, dita as seguinte resolución :



<b>Obxecto da transferencia de crédito</b>	<input checked="" type="checkbox"/> <i>Gastos instalación de caldeira de biomasa no edificio de usos múltiples do Concello de Porto do Son.</i> <input checked="" type="checkbox"/> <i>Gastos para a realización de proxectos de enerxías renovables: proxecto de eficiencia enerxética.</i> <input checked="" type="checkbox"/> <i>Adquisición de inmovible na Avda de Galicia</i>
<b>Aplicacións orzamentarias afectadas</b>	<input type="checkbox"/> Gastos de persoal. <input type="checkbox"/> Da mesma área de gasto. <input checked="" type="checkbox"/> De diferente área de gasto. <input type="checkbox"/> De diferente área de gasto para o gasto de persoal.

Visto que nas aplicacións indicadas na seguinte táboa, existe crédito dispoñible, polo que cabe efectuar transferencias de crédito entre as partidas do orzamento vixente non comprometidas,

Expte	Motivación do gasto.	Importe da modificación	Aplicación orzamentaria a incrementar	Proxecto a incrementar	Aplicación orzamentaria a minorar	Proxecto a minorar	Mesma área de gasto	Afecta a gasto de persoal
7	<input checked="" type="checkbox"/> <i>Gastos instalación de caldeira de biomasa no edificio de usos múltiples do Concello de Porto do Son.</i>	5.745,68 €	920.62300	2018/2//16	330.63200 334.63200 330.62900	2018/4//21 2018/4//37 2018/4//36	NON	NON
7	<input checked="" type="checkbox"/> <i>Gastos para a realización de proxectos de enerxías renovables: "Mellora eficiente do alumeadado público do Concello de Porto do Son"</i>	1.781,29 €	165.60300	2018/2//17	330.63200	2018/4//21	NON	NON
7	<input checked="" type="checkbox"/> <i>Adquisición de inmovible na Avda de Galicia</i>	28.419,91€	920.62200	2018/2//12	342.62200	28/2//39	NON	NON

Considerando que no orzamento do 2018, existe crédito nas aplicacións indicadas que se minoran, pero non existe crédito nas aplicacións indicadas que se aumentan, estímase necesario facer unha transferencia de crédito que minore o crédito nas aplicacións sinaladas e o aumente nas que se indican.

As aplicacións orzamentarias que reducen o seu crédito non causarán unha perturbación nos servizos correspondentes.

Visto que a base 19.3 a) das bases de execución do orzamento 2018 dispón que as transferencias de crédito entre distintos grupos de función deben ser aprobados polo Pleno da Corporación.

Pola presente,

### PROPOÑO AO PLENO DA CORPORACIÓN

**Primeiro:** Desistir da financiación parcial do proxecto de inversión 2018/2//12 con novo endebedamento e aprobar o gasto deste proxecto para a anualidade do 2018 con recursos propios, por importe resultante de incrementar os créditos iniciais con esta transferencia de crédito.

**Segundo:** Aprobar o expediente da transferencia de crédito número 7 de 2018 que se indica na táboa anexa, coa imputación contable ás aplicacións indicadas, no caso de que proceda:

Expte.	Motivación do gasto.	Importe da modificación	Aplicación orzamentaria a incrementar	Proxecto a incrementar	Aplicación orzamentaria a minorar	Proxecto a minorar	Mesma área de gasto	Afecta a gasto de persoal
7	✓ Gastos instalación de caldeira de biomasa no edificio de usos múltiples do Concello de Porto do Son.	5.745,68 €	920.62300	2018/2/1/16	330.63200 334.63200 330.62900	2018/4/1/21 2018/4/1/37 2018/4/1/36	NON	NON
7	✓ Gastos para a realización de proxectos de enerxías renovables: "Mellora eficiente do alumeadado público do Concello de Porto do Son"	1.781,29 €	165.60300	2018/2/1/17	330.63200	2018/4/1/21	NON	NON
7	✓ Adquisición de inmovible na Avda de Galicia	28.419,91€	920.62200	2018/2/1/12	342.62200	28/2/1/39	NON	NON

**Terceiro:** Dar conta á Intervención e Tesourería municipal deste acordo.

Porto do Son, 3 de xullo de 2018

O ALCALDE- PRESIDENTE,  
Asdo. José Luis Oujo Pouso."

D<sup>a</sup>. Josefa M<sup>a</sup> Hermo García di que van tratar un punto relativo á adquisición dun inmovible que, segundo avanzadas negociacións, custa 240.000 ou 250.000 euros, e pregúntase se non hai outras fontes de financiamento ou se pode mercar outro inmovible. Continúa dicindo que, ademais, non saben se ese inmovible está taxado ou inscrito no Rexistro da Propiedade, polo que pregunta se se van iniciar os trámites para a adquisición descoñecendo eses aspectos.

D<sup>a</sup>. M<sup>a</sup> Asunción Torres Parada expresa o desacordo do seu grupo cos investimentos que consideran que son derroches; engade que tampouco está de acordo con facer unha nova casa consistorial cando a actual basta. Os dous casos considera que son reflexo das maneiras de gobernar deste equipo de goberno.

Conclúe a súa intervención reiterando o seu desacordo co investimento dun millón de euros nas construción dunha nova casa do concello.

D<sup>a</sup>. M<sup>a</sup> Ánxela Franco Pouso apunta que os Orzamentos do concello se aprobaron en marzo e agora, en xullo, pregúntase se o goberno municipal é rendible para os veciños de Porto do Son, pois preveu crédito orzamentario para mercar unha casa que coa nova Lei de portos de Galicia non saben en que situación urbanística quedará.

A voceira do BNG, por outro lado, sinala que probablemente se precise dunha cantidade semellante á da compra para arranxar a vivenda, pois atópase ruínosa. Engade que, ademais, os rumores din que se quere mercar a vivenda lindeira. Todas esas cuestións, di, demostran a falta de previsión do goberno municipal.

En relación coa adquisición do inmovible, a Sra. Franco Pouso recorda que na comisión informativa se lles dixo que se empregarían 100.000 euros no 2018 e en 2019 se abonaría o resto do prezo, pero pregúntase de onde sairán os fondos para a anualidade do 2019 e de onde



sairán os 100.000 euros desta tendo en conta que nos Orzamentos se prevía financiar a compra con endebedamento. Engade que non entende estes cambios de opinión de marzo a xullo nin, tampouco, cal é o interese na compra. Tamén pide que lle aclaren de que partida se vai sacar o financiamento para o pago da anualidade 2019.

Conclúe a súa intervención propoñendo que os máis de 200.000 euros da compra da vivenda se destinen a acondicionar o Edificio de Usos Múltiples que, di, tamén ten vistas ao mar e ademais, alí está "radio PP".

D<sup>a</sup>. María José Maneiro Quintáns sinala que a Sra. Franco Pouso sempre critica ao goberno municipal polo que fai e di que lle gustaría saber se a actual Casa do Concello é mellor que a antiga alameda ou se a nova casa consistorial vai estar na situada na fachada marítima que se vai executar.

Prosegue expoñendo que son de sobra coñecidas as dificultades dos traballadores municipais na Casa do Concello, a falta de espazo ou os elevados custos que xera, p.e. de calefacción. Continúa detallando que no seu momento encargaran un proxecto de rehabilitación do edificio pero o custo era tan elevado como o da adquisición que se pretende.

A Sra. Maneiro Quintáns di que cren no futuro e agora teñen a ocasión de adquirir un inmovible que pode representar a primeira fase para materializar unha nova casa do concello e, de non ser iso posible, pode acoller dependenzas municipais pois a súa situación é ideal.

En relación coa compra dese inmovible, sinala que dispoñen dunha taxación, pois foi o primeiro que fixeron tan pronto lles deron un prezo. Tamén explica que a dotación prevista nos Orzamentos municipais, a procedente desta modificación orzamentaria e outras que se realizarán permiten acadar os 100.000 euros.

D<sup>a</sup>. Josefa M<sup>a</sup> Hermo García pídelles á Sra. Maneiro Quintáns que se aclare, pois onte na comisión informativa explicou que se trataba de iniciar o expediente de adquisición e comprobar a súa inscrición no Rexistro da Propiedade e agora resulta que o inmovible xa está taxado; sinala que o que dixo caeu polo seu propio peso.

Finalmente, a Sra. Hermo García reitera que ela preguntou se non se podía mercar outro inmovible pois considera que con 250.000 euros se poderían facer unhas boas instalacións municipais.

D<sup>a</sup>. M<sup>a</sup> Ánxela Franco Pouso, en alusión ao dito pola Sra. Maneiro Quintáns, pregúntase se lle chaman "recuperar a antiga alameda" a por a fonte "das cachas" e a emprender todo. Sinala que para recuperar a alameda debían comezar pola Casa da Cultura. Tamén se pregunta por que mercar a antiga Cámara Agraria para logo cederlla á Garda Civil ou porque se empregaron máis de 300.000 que deu a Deputación da Coruña no arranxo da ludoteca.

A voceira nacionalista continúa apuntando que a Casa do Concello, que non lle gusta ao goberno municipal, a fixo o Sr. Groveiro que é compañeiro seu no PP, e reitera que os 250.000 euros podían empregarse no arranxo do Edificio de Usos Múltiples pois alí ten o goberno municipal a "radio PP" e aos seus amigos. Prosegue a súa intervención recordando que os Sres. Quiñoy Taboada e Deán Pouso tiñan o compromiso de facer un club de xubilados en Portosín e, se cadra, esa sería unha obra que pagaba a pena e non outra de tipo electoralista.

Remata a súa intervención instando ao goberno municipal a acometer a actuación pretendida se a consideran boa, pero non poderán dicir que foron previsores.

O Sr. Alcalde- Presidente intervén para sinalar que os grupos da oposición continúan co “non é non”. Tamén recorda que cando presentaron os proxectos para a ludoteca e a escola infantil a Sra. Franco Pouso deu unha rolda de prensa que cualifica de esperpéntica e isto sabe que é unha cousa que lle molesta á voceira do BNG que diga.

D<sup>a</sup>. M<sup>a</sup> Ánxela Franco Pouso intervén para preguntarlle ao Sr. Alcalde que é o que lle pica a el e di que nin ela é a Sra. Ana Pontón nin el o Sr. Núñez Feijoó, pois ela contéstalle.

O Sr. Alcalde- Presidente di que nada do que fagan lle vale aos grupos da oposición e instaos a que fagan propostas boas pois, indica, se son como as que fixo a voceira do BNG naquela rolda de prensa é mellor que o deixen.

Non habendo mais intervencións, o Sr. Alcalde- Presidente dá paso á votación da proposta.

En consecuencia, o Pleno Corporativo, trala **votación ordinaria e por sete (7) votos a favor (7 PP) e con seis (6) abstencións (2 PSDG- PSOE+ 2 Portodos+ 2 BNG)**, polo tanto co **quorum da maioría absoluta**, sendo **trece (13)** o número legal de membros da Corporación, **APROBA a proposta** nos seus propios termos.

## **11. APROBACIÓN DO RECOÑECIMENTO EXTRAJUDICIAL DE CRÉDITO 21/2018.**

O Sr. secretario dá lectura á proposta da Alcaldía, que é do seguinte teor literal:

### **“PROPOSTA Ó PLENO DA CORPORACIÓN**

**Asunto: Recoñecemento de obrigas, recoñecemento extraxudicial nº:21/2018.**

José Luis Oujo Pouso, alcalde- presidente do Concello de Porto do Son.

Vistos os xustificantes de gasto indicados.

Visto o informe número 30/2018 da Intervención Municipal.

Vista a necesidade de proceder á aprobación dos xustificantes de gasto, dado que se trata de servizos prestados efectivamente e en virtude do principio de enriquecemento inxusto.

Nº de Entrada	Fecha	Nº de Documento	Fecha Dto.	Importe Total	Tercero	Nombre	Texto Explicativo	Programa	Económica
F/2018/1314	20/04/2018	FE17321246688733	19/10/2017	140,47	A08431090	GAS NATURAL SERVICIOS SDG, S.A.	POLO CONSUMO DE ENERXIA ELECTRICA NO BOMBEO DE RESIDUAIS DA ARNELA.	160	22100
F/2018/1315	20/04/2018	RE17326000034587	08/09/2017	133,22	A08431090	GAS NATURAL SERVICIOS SDG. S.A.	POLO CONSUMO DE ENERXIA ELECTRICA NO BOMBEO DE RESIDUAIS DA ARNELA.	160	22100



F/2018/1316	20/04/2018	RE17326000009693	13/07/2017	1077,89	A08431090	GAS NATURAL SERVICIOS SDG, S.A.	POLO CONSUMO DE ENERXIA ELECTRICA NO BOMBEO DE RESIDUAIS DE ABUIN.	160	22100
F/2018/1317	20/04/2018	RE17326000009691	13/07/2017	465,66	A08431090	GAS NATURAL SERVICIOS SDG, S.A.	POLO CONSUMO DE ENERXIA ELECTRICA NO BOMBEO DE RESIDUAIS DE ABUIN.	160	22100
F/2018/1540	08/05/2018	FE18137007021391	05/04/2018	441,05	A65067332	GAS NATURAL S.U.R. SDG, S.A.	POLO CONSUMO DE ENERXIA ELECTRICA NO ALUMEADO MUNICIPAL DA RUA ATALAIA DESTA VILA.	165	22100

Polo presente,

**PROPOÑO Ó PLENO DA CORPORACIÓN:**

**PRIMEIRO:** Aprobar por recoñecemento extraxudicial os xustificantes de gasto relacionados, con imputación da autorización, disposición e liquidación do gasto ás aplicacións orzamentarias indicadas.

**SEGUNDO:** Dar conta do presente acordo á intervención e tesourería municipal.

Porto do Son, a 7 de xuño de 2018.

O ALCALDE  
ASDO.-JOSÉ LUIS OUJO POUSO.”

As voceiras do PSdG- PSOE e de Portodos non fan uso da súa quenda de intervención.

Dª. María Ánxela Franco Pouso pregúntase que atopará o vindeiro goberno municipal pois seguen aparecendo facturas sen aprobar e algunha pasa do ano de antigüidade.

Dª. María José Maneiro Quintáns explica que son facturas de subministracións feitas por Gas Natural no ano 2017 e presentadas en 2018 e, por iso, non queda máis remedio que empregar este procedemento para aprobalas.

Non habendo mais intervencións, o Sr. Alcalde- Presidente dá paso á votación da proposta.

En consecuencia, o Pleno Corporativo, trala **votación ordinaria e por sete (7) votos a favor (7 PP) e con seis (6) abstencións (2 PSdG- PSOE+ 2 Portodos+ 2 BNG)**, polo tanto co **quorum da maioría absoluta**, sendo **trece (13)** o número legal de membros da Corporación, **APROBA a proposta** nos seus propios termos.

**12. APROBACIÓN DO RECOÑECIMENTO EXTRAJUDICIAL DE CRÉDITO 23/2018.**

O Sr. secretario dá lectura á proposta da Alcaldía, que é do seguinte teor literal:

## “PROPOSTA Ó PLENO DA CORPORACIÓN

**Asunto: Recoñecemento de obrigas, recoñecemento extraxudicial nº :23/2018.**

José Luis Oujo Pouso, alcalde- presidente do Concello de Porto do Son.

Vistos os xustificantes de gasto indicados.

Visto o informe número 36/2018 da Intervención Municipal.

Vista a necesidade de proceder á aprobación dos xustificantes de gasto, dado que se trata de servizos prestados efectivamente e en virtude do principio de enriquecemento inxusto.

Nº de Entrada	Fecha	Nº de Documento	Fecha Dto.	Importe Total	Tercero	Nombre	Texto Explicativo	Programa	Económica
F/2018/2066	13/06/2018	1150810265034	11/08/2015	163,53	A65067332	GAS NATURAL S.U.R. SDG, S.A.	POLO CONSUMO DE ENERXIA ELECTRICA NO ALUMEADO MUNICIPAL DE NOVAS.	165	22100
F/2018/2067	13/06/2018	1150811146242	23/08/2015	234,03	A65067332	GAS NATURAL S.U.R. SDG, S.A.	POLO CONSUMO DE ENERXIA ELECTRICA NO ALUMEADO MUNICIPAL DA CRUZ.	165	22100
F/2018/2068	13/06/2018	1150811143522	23/08/2015	25,34	A65067332	GAS NATURAL S.U.R. SDG, S.A.	POLO CONSUMO DE ENERXIA ELECTRICA NO ALUMEADO MUNICIPAL DE BUSTOSECO.	165	22100
F/2018/2069	13/06/2018	1150811134876	23/08/2015	207,27	A65067332	GAS NATURAL S.U.R. SDG, S.A.	POLO CONSUMO DE ENERXIA ELECTRICA NO ALUMEADO MUNICIPAL DAS INSUAS.	165	22100

Polo presente,

### PROPOÑO Ó PLENO DA CORPORACIÓN:

**PRIMEIRO:** Aprobar por recoñecemento extraxudicial os xustificantes de gasto relacionados, con imputación da autorización, disposición e liquidación do gasto ás aplicacións orzamentarias indicadas.

**SEGUNDO:** Dar conta do presente acordo á intervención e tesourería municipal.

Porto do Son, a 3 de xullo de 2018.

O ALCALDE  
ASDO.-JOSÉ LUIS OUJO POUSO.”

As voceiras do PSdG- PSOE e de Portodos non fan uso da súa quenda de intervención.

Dª. María Ánxela Franco Pouso supón que o goberno municipal foi incapaz de prever que Gas Natural facturaría o consumo dun bombeo. Engade que neste punto se trata de facturas do 2015 e supón que as van pagar.

Dª. María José Maneiro Quintáns di que non entende á voceira do BNG e que a razón de tratar este punto non é a falla de previsión do goberno municipal senón o feito de que Gas Natural non facturou cando debía pois, de telo feito no 2015, xa tería cobrado.

O Sr. Alcalde- Presidente fai uso da palabra para indicar que, tal e como lle pedira a Sra. Franco Pouso, trouxo á sesión a listaxe dos recoñecementos extraxudiciais de crédito do ano 2010,



cando a voceira do BNG formaba parte do goberno municipal. Apunta que suman 1,1 millóns de euros.

D<sup>a</sup>. María Ánxela Franco Pouso pregunta cales son as datas das facturas e quen as expediui, e engade que os recoñecementos extraxudiciais aludidos os fixeron para pagar os "pufos" do anterior goberno do PP.

O Sr. Alcalde- Presidente di que son documentos oficiais.

D<sup>a</sup>. María Ánxela Franco Pouso interrompe a intervención do Sr. Alcalde, que a advirte, sucesivamente, en dúas ocasións.

O Sr. Alcalde- Presidente continúa a súa intervención detallando os importes dos distintos recoñecementos extraxudiciais de crédito.

D<sup>a</sup>. María Ánxela Franco Pouso pídelles que indique os conceptos deses recoñecementos extraxudiciais.

O Sr. Alcalde- Presidente le algúns dos conceptos dos recoñecementos extraxudiciais de crédito e indica que o seu importe total ascende a 1.123.000 euros.

D<sup>a</sup>. María Ánxela Franco Pouso sinala que, cando accederon ao goberno municipal, se debían facturas desde o 2004 e tiveron que pedir un crédito para pagalas.

Non habendo mais intervencións, o Sr. Alcalde- Presidente dá paso á votación da proposta.

En consecuencia, o Pleno Corporativo, trala **votación ordinaria e por sete (7) votos a favor (7 PP) e con seis (6) abstencións (2 PSdG- PSOE+ 2 Portodos+ 2 BNG)**, polo tanto co **quorum da maioría absoluta**, sendo **trece (13)** o número legal de membros da Corporación, **APROBA a proposta** nos seus propios termos.

### **13. PROPOSICIÓN DO GRUPO MUNICIPAL DO BNG PARA DECLARAR PERSOAS "NON GRATAS" AOS COMPOÑENTES DA "MANADA".**

D. David Barrio Alonso dá lectura á proposición, que é do seguinte teor literal:

#### **"EXPOSICIÓN DE MOTIVOS**

O pasado venres, 21 de xuño, a Audiencia Provincial de Iruña acordou pór en liberdade aos cinco agresores (violadores), autodenominados "A Manada", condenados por ter sometido a unha moza de 18 anos a reiterados actos sexuais, por parte de todos eles, en contra da súa vontade e facendo uso da súa condición de superioridade: numérica, física e de idade, durante os Sanfermíns de 2016.

Estes feitos foron cualificados xuridicamente como abusos sexuais por parte do mentado tribunal que lle levou a condenar a 9 anos de prisión aos acusados. Que vén de completarse coa decisión de non

prorrogarles a prisión preventiva ante a gravidade do sucedido, polo que dende o venres 22 de xuño están na rúa. O tribunal emprega argumentacións difíciles de entender por parte da sociedade en xeral como se ten demostrado na rúa, e polo movemento feminista, en concreto.

É coñecido e notorio que A Manada non ten amosado o máis mínimo arrepentimento pola súa aborrecida pero habitual práctica. De feito, os cinco teñen defendido publicamente o seu desprezo pola vítima e sitúan o acontecido nun plano de normalización, elevando o sucedido a consentimento, a pesar de que ninguén o entende.

E como reacciona o Tribunal? Acordando que aos agresores deben manterse a 500 km de distancia da vítima. En definitiva, coa súa decisión, os maxistrados confinan á moza nunha suposta furna de cristal, e permite a libre deambulacón dos condenados por todas partes do territorio que consideren. Nesta situación, cabería preguntarse, pois logo, quen é o condenado: a vítima ou os seus agresores?

Non está demais lembrar que as Corporacións municipais son a expresión do mandato cidadá, e á marxe quedaríamos da sociedade se non recollemos o clamor da rúa, o pensar e sentir de miles de mulleres e homes, ante a inxusta resolución a esta situación tan grave, que vai contra a liberdade de máis do 50% da poboación deste Estado: as mulleres.

Non só apoiamos todas as mobilizacións convocadas; rubricamos todos os manifestos e colaboramos en todas accións de rexeitamento que se teñan ou se vaian organizar, canalizando, a través dos instrumentos democráticos, ese clamor cidadá. Chegou o momento de dar un paso máis, e que sexan as Corporacións Locais as que, de motu propio, poñan o seu gran de area na denuncia desta inxustiza social e sumarse, por iniciativa propia, ao berro cidadá polo caso da Manada. É o momento de declarar persoas non gratas nos nosos concellos a:

- José Ángel Prenda Martínez.
- Alfonso Jesús Cabezuelo Entrena.
- Jesús Escudero Domínguez.
- Ángel Boza Florido.
- Antonio Manuel Guerrero Escudero.

Para deixar claro o rexeitamento aos agresores en todo o país, porque a sociedade entende que si foi un feito moi grave. É necesario e urxente o entendemento da xustiza e a sociedade en temas tan sensíbeis; e con este feito, trasladamos a solidariedade e arroupo á vítima, para que non se sinta nin culpábel, nin sinalada nin condenada.

As agresións sexuais son a arma máis empregada para librar esta guerra contra as mulleres que, non era sen tempo, xa se vai facendo máis visíbel, e por fin deixou de ocupar espazos de recheo para situarse nos titulares de apertura dos medios de comunicación. A loita feminista das últimas décadas foi vital para iso.

O caso da Manada é o cumio do iceberg e debemos aproveitalo para visibilizar os centos de casos anónimos que suceden ao noso arredor con moita máis frecuencia da que nos pensamos; e por parte de homes que non están enfermos. Que saiban todas as vítimas anónimas que estamos con elas e que non nos doen menos. E que todos e todas entendamos que o silencio nos condena.

Polo anteriormente exposto, o Grupo Municipal do BNG solicita do Pleno da Corporación municipal a adopción do seguinte

#### **ACORDO:**

1. A declaración de persoas non gratas a:



- José Ángel Prenda Martínez.
- Alfonso Jesús Cabezuelo Entrena.
- Jesús Escudero Domínguez.
- Ángel Boza Florido.
- Antonio Manuel Guerrero Escudero.

2. Dar traslado deste acordo plenario á representación legal dos cinco condenados a nove anos de prisión pola agresión sexual xulgada na Audiencia Provincial de Iruña.

3. Dar traslado deste acordo plenario á representación legal da vítima para que sexa coñecedora do apoio real que ten.

Porto do Son, 3 de xullo de 2018.

Asdo.: Ánxela Franco Pouso.”

D. David Barrio Alonso di que pouco máis hai que engadir, e que carece de senso que un dos membros da “Manada” solicitase o pasaporte para tentar fuxir ou que outro, de profesión militar, fose reincorporado á UME.

D<sup>a</sup>. María José Maneiro Quintáns indica que van apoiar a moción, aínda que son moitas as vítimas e agresores que faltan na listaxe da proposición. Resalta que o tratado foi un caso moi mediático que tivo algúns efectos positivos, como as mostras de solidariedade coa vítima ou o rexeitamento aos agresores. Conclúe a intervención dicindo que agarda por cambios que protexan ás mulleres e ás súas fillas.

D<sup>a</sup>. Josefa M<sup>a</sup> Hermo García afirma que existe un clamor social arredor destas cuestións e que cando unha muller di “non” é “non”. Sinala que para o PSOE eran “persoas non gratas” desde o primeiro momento. Na súa opinión, teñen, como nais que son, que preocuparse aínda máis polas súas fillas e, ademais, é un imperativo que o goberno modifique a lexislación e tome cartas neste asunto.

D. José Ángel Lorenzo Vila agradécelle ao BNG que trouxese ao Pleno esta proposición, que considera que debería tratarse en todos os concellos do país xa que a sentenza que se ditou neste asunto é moi grave.

O voceiro de Portodos explica que tiña preparados uns argumentos para tentar convencer ao grupo político do PP para que votase a favor: tería declarado que D. Rafael Catalá mencionou o “problema singular” que ten o xuíz que votou a favor da absolución dos membros da “Manada” e que a sentenza foi rexeitada polas asociacións de xuíces e por algúns dos partidos máis representativos.

Remata a súa intervención agradecendo o apoio do grupo do PP á moción e sinalando que, como pai de dúas fillas, está moi contento de que os membros da “Manada” sexan declarados “persoas non gratas”.

D. David Barrio Alonso agradécelle aos grupos políticos o seu apoio á proposición e agarda que con este pequeno gran de area pida contribuir a erradicar este problema da sociedade.

Non habendo mais intervencións, o Sr. Alcalde- Presidente dá paso á votación da proposta.

En consecuencia, o Pleno Corporativo, trala **votación ordinaria e por unanimidade (7 PP+ 2 PSdG- PSOE+ 2 Portodos+ 2 BNG)**, polo tanto co **quorum da maioría absoluta**, sendo **trece (13)** o número legal de membros da Corporación, **APROBA a proposición** nos seus propios termos.

## **14. PROPOSICIÓN DO GRUPO MUNICIPAL DO BNG RELATIVA Á MODIFICACIÓN DA LEI DE PORTOS DE GALIZIA.**

D<sup>a</sup>. María Ánxela Franco Pouso dá lectura á proposición, que é do seguinte teor literal:

### **“EXPOSICIÓN DE MOTIVOS**

Galiza conta cunha gran cantidade de portos e instalacións portuarias, e ten a densidade portuaria máis alta da península ibérica, que fan que o sector portuario galego sexa un sector estratéxico cun gran potencial e que até agora, desde que en 1981 o Estatuto contemplara a competencia exclusiva no sector e deixando a un lado de maneira aberrante aos portos de interese xeral, non foi aproveitada.

A pesares destas características, o sistema portuario galego non foi regulado por unha lei específica ate que o ano pasado aprobouse a Lei 6/2017, do 12 de decembro, de portos de Galiza. Despois de terse feito agardar tantos anos, resultou decepcionante, pois non respondeu nin as expectativas nin as necesidades deste sector estratéxico, e ademais estase a demostrar prexudicial para o futuro do sector portuario galego.

Esta lei, destaca polo seu claro afán recadatorio e por terse realizado de costas ás entidades locais. Son moitos os concellos que na actualidade están a expresar o seu malestar polas abusivas tarifas que Portos de Galiza está a cobrar pola realización de actividades no espazo público portuario, que, ao cabo e na maioría dos casos é un espazo totalmente integrado no espazo urbano do concello e son as propias entidades locais as que se encargan do mantemento do espazo, da recollida do lixo, etc. Neses espazos realízanse múltiples actividades plenamente inseridas na dinámica social local, como festas, eventos deportivos ou mercados que deben pagar unhas abusivas taxas a Portos de Galiza para poder realizarse.

A meirande parte delas realízanse en espazos urbanos que, a pesares de estar baixo a xestión de Portos de Galiza, nada teñen que ver coa actividade portuaria. Así, existen espazos como alamedas ou paseos plenamente integrados no entramado urbano local, e que, principalmente debido a recheos, forman parte de Portos de Galiza sen que exista unha razón obxectiva para que así sexa, xa que logo, consideramos que a titularidade destes espazos debería ser transferida aos concellos.

De cara a paliar a nula participación dos concellos nas decisións relativas ás materias que resulten de relevancia tanto para o concello como para Portos de Galiza, propoñemos a creación do Órgano de Coordinación Portuario Municipal, onde estarán representados tanto o goberno local como Portos de Galiza. Este órgano sería o encargado de articular as relacións entre a administración portuaria e as administracións municipais cuxos municipios dispoñan de porto, mediante a toma de decisións conxunta nas materias que resulten de relevancia para ambas administracións.



Por último a citada lei contempla un abusivo réxime de prohibicións e sancionador que cremos necesario modificar, en especial no referido ao baño e a pesca, actividades que deberían quedar eximidas destes citados réximes. Consideramos que a pesca deportiva debería quedar excluída da prohibición que rexe sobre o desenvolvemento de actividades marisqueiras e pesqueiras nas augas interiores do porto constitutivas da denominada "zona I".

Polo anteriormente exposto, o Grupo Municipal do BNG solicita do Pleno da Corporación municipal a adopción do seguinte

#### **ACORDO:**

O pleno do Concello insta á Xunta de Galiza a realizar as modificacións legislativas oportunas de xeito que:

- 1.** As autorizacións para instalacións de lecer e similares propostas polas entidades locais e entidades sen ánimo de lucro, non lles será de aplicación os artigos 59, 60, 61, 62, 63 e 64 da Lei 6/2017, do 12 de decembro, de portos de Galiza, de xeito que ditas entidades queden exentas do pago das taxas pola realización de actividades no denominado dominio público portuario tanto a administracións locais como a entidades sen ánimo de lucro.
- 2.** Se cree o Órgano de Coordinación Portuario Municipal como instrumento de participación institucional e social en materia de portos, onde estarán representados tanto o goberno local como Portos de Galiza.
- 3.** Se leve a cabo un procedemento entre Concellos e Portos de Galiza -previa solicitude do concello interesado- co obxecto de transferir a titularidade aos Concellos dos espazos de dominio público portuario que estean integrados nos cascos urbanos das vilas e cidades e que non teñan uso portuario.
- 4.** Se modifique o réxime sancionador contemplado na Lei 6/2017, do 12 de decembro, de portos de Galiza, de cara a reducir as abusivas sancións que esta contempla, e nomeadamente suprimir do réxime sancionador as actividades de bañarse ou mergullarse nas augas interiores do porto e pescar desde os peiraos ou con calquera tipo de arte nas dársenas e augas portuarias, cando iso non estea expresamente autorizado.
- 5.** Se exclúa á pesca deportiva da prohibición que rexe sobre o desenvolvemento de actividades marisqueiras e pesqueiras nas augas interiores do porto constitutivas da denominada "zona I".

Porto do Son, 4 de xullo de 2018.

Asdo.: Ánxela Franco Pouso."

D<sup>a</sup>. María Ánxela Franco Pouso explica que a nova Lei de portos de Galicia contempla subas das taxas, polo que supón que o goberno municipal estudou como lle vai afectar aos espazos de uso e desfrute público. Tamén di que agarda que se cree un órgano de coordinación para este asunto e se exima de taxas o uso dos espazos aludidos.

D<sup>a</sup>. María José Maneiro Quintáns di que non poden apoiar a proposición xa que non comparten ningún dos puntos do acordo:

- en relación co 1º, cren que os clubs náuticos e deportivos, ao carecer de ánimo de lucro, estarían exentos de pagar a ocupación do porto, o que non lles parece xusto. Doutro

lado, a eliminación da taxa por ocupación xeraría un grave descontrol nas zonas portuarias pois non habería ningún instrumento para controlar aquela ocupación. Engade que tampouco se constataría se algunha desas entidades ten prohibicións para contratar.

- Sobre o 2º punto, afirma que ese órgano sería preciso se non funcionase a coordinación pero, como o fai, non é preciso.
- En relación co 3º, para os usos portuarios polo concello xa hai establecido un procedemento. Ademais, están en contra pois, noutro caso, pregúntase se Portos de Galicia financiaría a obra da "fachada marítima" se non fose dominio público portuario.
- Acerca do 4º, trátase dunha prohibición por motivos de seguridade pois consideran que é unha temeridade permitir o baño nas zonas portuarias.

A Sra. Maneiro Quintáns remata indicando que os puntos citados foron emendas do BNG á Lei de portos e rexeitadas pola maioría, polo que lle pregunta ao grupo nacionalista se sabe o que é a democracia.

D. Luis García Gaciño indica que no seu grupo político non cren que todo sexa branco ou negro, aínda que non defende a Lei de portos. Na súa opinión, trátase de que os concellos se fagan cargo das zonas que tradicionalmente forman parte da vida urbana, cuestión para a que non ven inconveniente no seu grupo.

D. José Ángel Lorenzo Vila puntualiza que no convenio con Portos de Galicia para financiar a obra da "fachada marítima" hai cláusulas nas que se indica que as actuacións deportivas teñen exencións se non teñen carácter comercial, polo que entende que neses casos non se cobraría a taxa.

O Sr. Alcalde- Presidente intervén para explicar que o convenio con Portos de Galicia non trata o que mencionou o Sr. Lorenzo Vila, senón que alude a bonificacións do 90 % da taxa polo uso do edificio que se vai construír.

D. José Ángel Lorenzo Vila di que non se refería a ese punto e que cre que se aludía no convenio a actividades deportivas e que se establecía unha exención das taxas se non se realizaban actividades comerciais con ánimo de lucro.

Dª. María José Maneiro Quintáns fai uso da palabra para indicar que o convenio con Portos de Galicia menciona bonificacións do 90 % para actividades culturais e deportivas, pero non é iso do que trata a proposición.

Dª. María Ánxela Franco Pouso considera que os voceiros do PSdG- PSOE e de Portodos explicaron o asunto perfectamente e que a cuestión é tan sinxela como expuxo o Sr. García Gaciño: p.e., en Portosín, xunto ao restaurante "Portofino", cando a rede de saneamento se atoa é o concello quen ten que arranxala e esa rúa mantena o concello pero, sen embargo, perténcelle a Portos de Galicia; tamén, cando se fan actuacións na zona portuaria, o concello ten que pagar e deixar limpo o espazo; todo iso parécelle normal ao Sr. Alcalde.

A voceira do BNG sinala que non están a falar de todos os espazos libres dos portos senón daqueles que están integrados na actividade ordinaria do pobo e tamén de que se eximan de pago determinadas cousas. Engade que se ao goberno municipal lle parece normal que cando o concello usa o terreo de portos lle cobren e cando sexa ao revés non se faga, nese caso, pode facer o que queira.



O Sr. Alcalde- Presidente di que a voceira nacionalista se obstina co tema da “fachada marítima”, e pregúntase como é que presenta a proposición que se debate cando no convenio ao que se veñen referindo se contempla, p.e., a implantación de redes de saneamento separativas a cargo de Portos de Galicia.

D<sup>a</sup>. María Ánxela Franco Pouso pregunta se nesa zona non hai rede separativa de saneamento.

O Sr. Alcalde- Presidente pregúntalle á voceira do BNG se non o sabía, se non coñecía que na Avenida de Galicia non había rede separativa de saneamento e se ela non foi concelleira de obras.

Conclúe a súa intervención instando ao BNG a que leve a proposición que se debate ao Parlamento.

Non habendo máis intervencións, o Sr. Alcalde- Presidente dá paso á votación da proposta.

En consecuencia, o Pleno Corporativo, trala **votación ordinaria e por seis (6) votos a favor (2 PSdG- PSOE+2 Portodos+ 2 BNG) e con sete (7) votos en contra (7 PP)**, polo tanto co **quorum da maioría absoluta, sendo trece (13) o número legal de membros da Corporación, REXEITA a proposición.**

## **15. MOCIÓNS URXENTES.**

Non se presentan mocións urxentes.

## **16. DACIÓN DE CONTA DOS DECRETOS DA ALCALDÍA E ACTAS DA XUNTA DE GOBERNO LOCAL.**

O Sr. Alcalde- Presidente dá conta dos decretos da Alcaldía dos núms. 278/2018 ao 473/2018 e das actas da Xunta de Goberno Local do 21 e 31 de e do 22 de xuño de 2018.

## **17. ROGOS E PREGUNTAS.**

D. José Manuel Deán Pouso resposta ás preguntas formuladas na anterior sesión ordinaria do Pleno e que non foron contestadas nesa mesma sesión.

a) Preguntas de D. José Ángel Lorenzo Vila:

1/ ¿Ademais do cambio de madeiras, váiselle dar un tratamento á pasarela da praia da Agueira para contrarrestar a súa deterioración?

Non, vanse repoñer as madeiras deterioradas.

b) Preguntas de D<sup>a</sup>. María Ánxela Franco Pouso:

1/ ¿A que atende que a delegación que fixo a Alcaldía delegue na Xunta de Goberno Local e que se publicou no BOP do 18 de abril? Ata o de agora non se actuou dese xeito e estránanlles eses cambios de conduta tan repentinos.

Consideramos que para acadar unha maior eficacia na tramitación dos expedientes de execución orzamentaria e para favorecer a coordinación das distintas áreas nas que se organizan os servizos administrativos municipais nos indicados procedementos de execución de gastos, estímase conveniente delegar na Xunta de Goberno Local a competencia da Alcaldía para a aprobación de gastos polo procedemento de recoñecemento extraxudicial de crédito cando exista dotación de crédito orzamentario.

2/ Nas obras de 200 e pico mil euros de investimentos para mellora de camiños que o goberno municipal anunciou na prensa, ¿inclúese algunha pista que sexa competencia da concentración parcelaria, como a do Outeiro de Beneso, na que o Sr. Alcalde lle dixo aos veciños que o concello xa se encargaba das obras?

Non

3/ ¿Que saben do coche do concello, cun remolque, que foi depositando rodas usadas nos colectores de Loreto e da pista de Agrelo fai, aproximadamente 2 semanas, aproximadamente ás 9 da noite?

Nós non sabemos nada. Se vostede o sabe súa obriga e denuncialo, e non solo botar a lingua a pacer.

4/ ¿Que acontece cos vertidos do Outeiro Baixo? ¿Que acontece co vertido existente fronte ao bar "Caribe"?

En xeral, cando o concello ten coñecemento dun vertido,ponse en marcha un plan de actuacións municipais, unhas máis sinxelas e outras máis complicadas, cando require por exemplo, a construción dunha depuradora. De tódolos xeitos non temos constancia de vertidos nos dous puntos que vostede indica. Aclárenos vostede a que se refire.

5/ ¿Debe entender, despois de 4 anos, que se deu un informe favorable para que a empresa que elaborou o Inventario de Bens cobrase 18.000 euros da Deputación da Coruña e ese traballo non ten validez? ¿Como lle chaman a iso con 5 dedicacións?.

A empresa realizou o traballo e o inventario foi aprobado inicialmente. Falta subsanar os erros que contén o documento e levalo a aprobación definitiva.

6/ Din que o Inventario de Bens non contempla os camiños, pero supón que cando se dá licenza para ocupar a vía pública é porque esa vía figura no Inventario. ¿Desde cando os camiños municipais non forman parte do Inventario de Bens do concello? Cando se fai un bacheo nun



camiño, ¿como saben que non están facendo un bacheo nun camiño privado? Vaian mirando o que pasa con ese inventario.

No noso inventario de bens municipais non están inventariados os camiños públicos, si ben creemos que sería bo facer ademais un inventario de camiños, que non existe. Para determinar titularidade pública dun camiño, de forma xeral, está cuestión non supón maior dubida.

7/ A radio de Porto do Son, que se atopa nunha situación ilegal, presta un servizo público, polo que debería retransmitir as sesións. Ademais, se é municipal todos os grupos políticos terán dereito a intervir, ¿non?

Nunca se negou asistencia a ningún grupo político á radio municipal porque é unha radio aberta a todos. E máis, dende o grupo de goberno vos animamos a unha participación efectiva que votamos en falta.

8/ Como van tanto polas parroquias, ¿informaron aos veciños do "sopapo" de 60 euros da Axencia Tributaria?

Como ben sabe vostede, é o Catastro o que debe informar ó respecto, e a única entidade que conta coa información para poder facelo. A nosa labor consiste en atender as dúbidas e axudar os veciños en todo o que poidamos,

9/ ¿Como é posible que no Colexio de Caamaño sigan sen poder enchufar os ordenadores e unha estufa á vez cando fai frío porque saltan os machetes? Insta aos concelleiros do goberno municipal a que vaian polo colexio xa que se ten aos nenos pasando frío durante todo o curso.

¿De todos os colexios do concello solo hai problemas no de Caamaño? Para a súa tranquilidade, o ordenador está enchufado e a calefacción funcionando.

10/ ¿Que está previsto facer na Relación de Postos de Traballo cos falsos autónomos que teñen agochados?

A relación de postos de traballo foi suficientemente debatida neste pleno.

11/ O Sr. Alcalde- Presidente dixo na prensa que unha das cousas que contemplaba era a instalación dun hotel no "Chilango", antes "Residencia México". ¿Teñen dobre moral? Dun lado solicítanlle a Costas que retire o campo de fútbol de Xuño e o colexio de Portosín para deixar esa franxa de praia a disposición da xente e doutro queren que nunha praia con tanta afluencia de xente se permita facer un hotel. ¿Vaise autorizar un hotel nese emprazamento?

Se Costas autoriza tales actuacións, e unha vez o propietario solicite licenza, se as obras e os usos son autorizables, contarán con licenza municipal; en caso contrario, non.

12/ ¿Que acontece para que a empresa "R" só busque clientes e só afronta o uso e a sinal nas rúas que xa están amañadas? ¿Só busca a ganancia, pois supón que nesas rúas o concello xa instalou as canalizacións e a empresa unicamente pasará a tubaxe? ¿Hai veciños de "última xeración", que deben ser os da aldea e, entre os do casco urbano uns que son "selectos" e outros "menos selectos"? A mellor cobertura, con diferenza, é a que dá o "dron" para encher o peto.

"R" é unha empresa privada que quere prestar servizos no Concello de Porto do Son. Se ten algunha queixa ao respecto, debe poñerse en contacto con eles.

13/ ¿Ten o concello unha ordenanza para lavar coches na vía pública? ¿Por que non se cumpre? Se hai un veciño ao que de xeito continuado, e por ser vello, se lle lava un coche á porta da casa de xeito continuado e hai unha ordenanza que non se cumpre, o goberno municipal non ten vergoña.

Existe unha ordenanza que prohíbe lavar coches na vía pública, e téntase cumprir sempre e buscar a conciliación entre os veciños.

14/ ¿A que se destinaron os ingresos do parque eólico dos anos 2014, 2015 e 2016 que suman un total de 77.132,60 euros? ¿É certo que acadaron un compromiso coa parroquia de Xuño de empregar parte deses ingresos nesa parroquia? ¿Que acontece co resto de parroquias? Roga que se invistan no monte.

Os ingresos do canón eólico non son ingresos finalistas, son destinados, en xeral as partidas de gasto que pode consultar nos diferentes orzamentos.

c) Preguntas de D. David Barrio Alonso:

1/ ¿Onde están as fontes que se retiraron da Alameda e da Rúa da Roda?.

Están almacenadas e a bo recado.

2/ ¿Por que se instalaron uns resaltes en Miñortos para baixar a velocidade dos vehículos, pois non semella que se trate dunha demanda veciñal nin tampouco haxa unha elevada sinistralidade? Engade que o Regulamento de circulación dispón que eses resaltes deberían estar sinalizados.

Considerouse que era necesario para minorar a velocidade do tráfico.

3/ ¿Tense pensado repor as táboas rotas e deterioradas da pasarela de madeira das Furnas antes do verán?

Estamos repoñendo as madeiras rotas nas pasarelas nas que sexa necesario.

\*\*\*\*

O Sr. Alcalde- Presidente indica que, de acordo do Regulamento orgánico, cada grupo político pode formular 3 preguntas.

a) D<sup>a</sup>. Josefa M<sup>a</sup> Hermo García fai os seguintes rogos e preguntas:

1/ ¿Sabe o Concelleiro de Cultura que o Museo Marea non ten letras?

2/ ¿Pasou por alí? ¿Decatouse diso?

3/ ¿Cantas Xuntas de Coordinación de Concelleiros Delegados se celebraron no que vai de 2018? ¿Cantas actas se aprobaron para podelas consultar?



4/ ¿Cando teñen pensado repor as madeiras podres da pasarela da praia das Furnas?

5/ Roga, aínda que polo que a ela concirne non vai ser, que se apliquen correctamente a Lei orgánica de protección de datos de carácter persoal e o Regulamento europeo de protección de datos, e pregúntase como van actuar, p.e., coas fotos dos nenos que participan en actividades.

b) D. José Ángel Lorenzo Vila fai os seguintes rogos e preguntas:

1/ Roga que se adopten as medidas oportunas para que os nenos non accedan ao edificio abandonado que hai no Outeiro (chamado "o esqueleto"), pois hai nenos que están subindo ao último piso.

2/ Roga que se instale algún cartel na estrada AC- 550 para informar da circulación en paralelo dos ciclistas.

c) D<sup>a</sup>. M<sup>a</sup> Asunción Torres Parada fai os seguintes rogos e preguntas:

1/ ¿Cal é a persoa que resolve as dúbidas sobre o Castastro?

2/ Roga, reiterando unha petición anterior, que se melloren as condicións para os cans que se gardan na nave do Loreto.

3/ Roga, reiterando unha petición xa feita, que se repoñan as pasarelas nas praias de San Pedro de Muro pois hai moitas táboas rotas.

4/ Roga que se poña nun estado decente o Centro de Interpretación das Lagoas pois a súa situación é lamentable.

d) D. David Barrio Alonso fai os seguintes rogos e preguntas:

1/ Roga que se busque algún tipo de solución para a circulación de vehículos na intersección da Igrexa en Xuño; para ese fin, ponse a disposición do concello para o necesario.

e) D<sup>a</sup>. María Ánxela Franco Pouso fai os seguintes rogos e preguntas:

1/ Roga que se dote de máis viradoiros de emerxencia nas zonas de praia.

2/ Roga que se sinalicen os asadores e se indique a época na que se poden usar.

3/ Roga que se lle envíen por correo electrónico os decretos da Alcaldía.


4/ ¿Por que este ano o Xantar dos Maiores se facturou e non se licitou como no ano anterior?

5/ ¿Está previsto arranxar a fonte de Caveiro, posto que está seca?

6/ ¿Como vai o caso da imputación do Sr. Alcalde- Presidente nos tribunais?

E non habendo máis asuntos que tratar, de orde da Alcaldía- Presidencia, levántase a sesión, sendo as **23:50 horas** do día **12 de xullo de 2018**, de todo o que se estende a presente acta, da que eu, como secretario dou fe.

O ALCALDE- PRESIDENTE.



Asdo. José Luis Oujo Pouso.

O SECRETARIO, que dá fe



Asdo. José Manuel González García.